



行水金鑑

百卅六
百四十

ル 5
1174
19



行水金鑑

卷第三百三十六

中憲大夫分巡淮揚等處地方兼理漕務海防河道鹽課屯田事務江南提刑按察使司副使加七級傳澤洪錄

運河水

聖祖仁皇帝康熙二十四年九月十八日總河靳輔題
奏高寶興泰山鹽等七州縣下河田畝被積水沈淹
者自明代已然其患非一日矣我

皇上親幸斯土目擊黎民昏墊之苦特沛 恩綸大加
修治既遣臬臣于成龍專管督理又以臣任河年久
應知挑浚機宜并

命臣綜理其事敢不捐頂糜踵黽勉奮發力圖報效



是治之一法宜握要領審全局而曲圖節省也蓋七
州縣下河海口高昂而地低於海潮不下五尺從前
海潮內灌不可以耕曾經宋臣范仲淹築隄以障之
隄成而民享其利名其隄曰范公隄頌之感之至今
不衰今若循先挑海口之議則是引潮內侵與范隄
障水之意相悖不特積水必不能洩而糜帑殃民將
無底止矣治之之法全在東水注海夫內地既卑於
海潮五尺則應於內地築隄高一丈六尺以高一丈
六尺之隄自足以束高一丈之水內水既束高一丈
則高過海潮五尺其趨海之勢必速而無流滯之虞
矣隄既高一丈六尺則隄頂高過水面六尺其束水

之力必堅而無旁潰之患矣臣所謂宜握要領者此
也築隄束水固為握要之計然運河之新舊減水閘
壩何止數十處即下河七州縣之河渠溝港所以承
運河各閘壩之水者何止數十道若不盡行築隄以
束各處減下之水則水仍散亂無收漫淹田畝若欲
一槩興築則其費數倍何止須帑千餘萬金臣再四
籌維查減水壩之最大而多者莫過高郵城南今應
將高郵城北并車邏以南邵伯鎮以北之零星閘壩
俱行閉塞拆取石料移於高郵城南邵伯鎮南二處
改建深底大石閘二座俾洪澤湖減下之水并天長
盱眙各山澗之水由高郵城南之南關大壩五里八

里柏家墩車邏等壩并新議建之大石閘內洩去十分之八邵伯鎮南已建之減水壩并新議建之大石閘內洩去十分之二邵伯鎮南所洩之水半由芒稻河并通州入江半由串場河入海高郵城南所洩之水應自車邏鎮起築大橫隄一道直抵高郵再自高郵城東起築大隄二道歷興化縣白駒場至海東各閘壩洩下之水彙歸一處直達大洋且必量入爲出寧使出水之地寬大於進水之地使所進之水安流下注而無擁刷隄工漫潰決裂之虞故內地窪區築隄高一丈六尺之河止寬一百五十丈海灘高地築隄高一丈之河必寬一百八十丈也臣所謂宜審全

局者此也至於各工隄堰艱於取土者舊例每方給銀三錢尚有攤銀夯硤之夫在外然三錢一方之土近者不過數里之外遠者不過一二十里之外今此番隄工興築於萬頃汪洋一望無際之中近者數十里見土遠者百餘里見土艱難既數倍於尋常則其不貲之費從何措處查難築之各工共長六萬三千丈牽需土六百零四萬八千方毋論取土之艱數倍常時即以加價一倍計之而此六萬三千丈工程即需帑三百六十餘萬兩矣且夫船兩難曠日持久不知竣工於何日臣百計籌畫作就近取土之策其法先定隄基隨用船裝遠土於水內築成圍埂其埂出

水二尺中間寬三十丈長五十丈圍埂既成一面用
草料防護一面將隄內之水車乾然後於離隄基十
五丈之外挖土挑至隄基之上密加夯碾築成大隄
其隄應築成頂寬二丈底寬十丈高一丈六尺每隄
一丈用土九十六方連船裝築埂之土并車水防埂
一切大工器具物料以及陰雨食米等項每方止需
銀二錢六分六萬三千丈共止需銀一百五十七萬
二千四百八十兩較之尋常估費者約省過半臣所
謂曲圖節省者此也司臣于成龍於奉

旨任事之後閱歷月餘其訪採輿論審量經營之處頗
饒苦心臣與該司面為商酌作聚水之形區畫開濬

僭築諸法除各工六萬三千丈需銀一百五十七萬
二千四百八十兩外其餘一切挑築工程大約與舊
例相同止於築隄者每方連陰雨食米等項給銀一
錢六分連挑帶築者以築成隄土為準每方連陰雨
食米等項給銀一錢八分內一自白駒場至海口應
挑大河二道共約長二萬四千丈即以挑河之土築
成頂寬二丈底寬七丈高一丈之大隄二道每隄一
丈用土四十五方連挑帶築每方給銀一錢八分二
萬四千丈共需銀一十九萬四千四百兩又自白駒
場北至廟灣南歷海安泰州至芒稻河約共應築隄
十五萬丈其隄大小不等用土多寡不等土方價值

一錢六分一錢八分不等共需銀七十六萬八千兩
高郵州邵伯鎮南各建大石閘一座白駒場南北兩
岸亦各建大石閘一座共建石閘四座除拆取廢閘
石塊外其添買石塊轉運舊石以及椿木灰米錠錫
夫匠工食等項并閘旁添建木涵洞二百個分引河
流稍殺閘門內建瓴之勢共需銀六萬兩又前工盡
完之後上流湖河之水悉由新築水工大河內入海
涓滴不能旁洩若遇大旱之年難免禾苗枯稿今創
建木涵洞二百個隨時啓閉以資灌溉為永遠裕國
利民之計每個需銀一百兩共需銀二萬兩又水工
大堤六萬三千丈地勢最卑而河寬水急風浪時侵

若不預為保護之計則一時風起便有倉皇無備束
手莫措之虞此隄一有損失則全功盡棄為害非輕
今估將此六萬三千丈工程盡捲四五尺高順埽再
加丁頭草橫疊鑲護每隄一丈估用草蘆椿柳夫匠
工食等項共計銀二兩四錢三分六萬三千丈共需
銀一十五萬三千零九十兩又白駒場至海口共隄
二萬四千丈雖地勢稍高而河寬水急亦應用草防
護每丈需草價銀六錢共需銀一萬四千四百兩以
上修治高寶等七州縣下河工程共需銀二百七十
八萬二千三百七十兩伏乞

皇上敕下部議將所需前項銀兩先

賜撥發一半以便乘時僱工餘容臣陸續請撥限三年告竣庶事無諉卸可免曠日持久之虞矣臣擬將此項銀兩俱作工所暫時借支請於工完三年之後分為五七年解還戶部其解還之法又當分為二項內如築水工大隄海口大隄并護隄埽料以及建高郵城南石閘一座引水灌田木涵洞二百個乃專為七州縣田畝而舉者也若北自廟灣起南至芒稻河止兩岸隄工并邵伯鎮南白駒場兩岸石閘共三座乃係創興各場鹽運之大利者也何也蓋水工海口隄河工竣之後各減水閘壩之水既盡歸新河入海則七州縣水滄原額地畝必皆盡行涸出地既涸出則

串場河亦涸而淮南綱鹽一百三四十萬引無從輓運故必須并築串場河兩岸之隄再并建邵伯鎮南白駒場新河兩岸之石閘三座也臣查見在淮南運鹽之艱有三一則串場河底高低不一天氣稍旱則河底稍高之處即便淤塞多挽拽之費二則串場河不通運河凡引鹽出場必另用小船由漫灘積水湖內盤壩而過方到運河船上是多盤脚僱船之費三則鹽船必經芒稻河每遇水漲之候大溜掣船異常危險非用數百人增添繩纜設法挽拽不能過溜是又多僱夫之費以上三費每鹽一引必須增費一二錢不等若此築隄束水之工一成則運河大船可

以竟至串場河受載自串場河開行或過高郵閘或過邵伯閘寬河大港一水直達揚州既無淺澀之艱又無盤壩之阻更免溜掣之險省費既多而鹽船又得安流計日可到故曰創興運鹽之大利也臣竊擬補帑之法凡因有利田畝而興築者則所費之帑應於田畝項下陸續償還者臣遍歷下河七州縣地方西至運河東至大海南至江泰舊河北至黃河遙隄按其廣袤之遠近察其積水之淺深約畧科之將來工完之後除去河湖城郭村鎮墳塋鹽場柴蕩外可得田十四

五萬頃此七州縣全書所載額田不過十一萬頃是額外餘田不下三四萬頃矣即以泰州而論地方平衍廣闊按法而稽應有田四五萬頃今全書額田僅九千二百餘頃蓋所種實田止有此數餘皆沮洳沈沒之區一州如此他可類推故曰工完之後則額田而外可得餘田三四萬頃也今擬將涸出之地逐一清丈先將原額數內之田盡行給主其原額之外者曰額餘官田當廣招窮民墾種給為永業地畝肥瘠不等肥者止取佃價銀一兩二錢瘠者止取佃價銀六錢每畝止牽取佃價銀九錢額餘官田最少亦有三萬頃可得佃價銀二百七十萬兩內以一百九十

六萬餘兩解交戶部抵還借支之項其餘七十餘萬兩應將高家堰臨湖隄工并山寶高江四州縣運河隄工再加高厚更將山清盱寶高江六州縣境內凡有關於高寶下河之零星應挑應築工程逐一料理以期永保無虞爲久奠下河之計真國計民生萬世之利也其應於引鹽項下陸續償還者查淮南綱鹽每歲一百三四十萬引河隄告成之後每引每年既可省盤剥之費一二錢不等今止令其於所省之內每引每年納河隄銀九分以七年爲率七年數足之後免其再納計每年可得銀十二萬兩不過七年而此八十一萬餘金之帑又可補還無欠此在鹽商量

捐省費之資而坐享久遠之利者也

靳文襄公治河書

聖祖仁皇帝康熙二十六年正月十七日工部等衙門會覆監修下河侍郎孫在豐等所奏之疏等因該臣等會議得

皇上親見高寶等七州縣生民遭罹水患軫念疾苦特遣大臣責任修理下河事宜欲使被水災黎亟離昏墊以此冬季停工之際奉有宣總河靳輔詢問之旨欽遵將靳輔宣來詢問據稱高郵以南大減水壩二座自正月起至五月盡止可以閉塞小減水壩三座自正月起至三月盡止可以閉塞其高家堰等處各壩高郵州以南五壩萬難閉塞車邏以南邵伯鎮以

北所有開壩俱於去年閉塞高郵以北開壩亦可以
閉塞者今挑浚下河最為緊要應將高郵以北開壩
閉塞等語且監修下河侍郎孫在豐等疏稱先將近
海口之石礮白駒丁溪等處估計興修靳輔先前請
修疏內稱高郵以北開壩并車邏以南邵伯鎮以北
零星開壩俱欲堵塞等語今將車邏以南邵伯鎮以
北所有開壩於去歲堵塞高郵以北開壩亦有可以
閉塞等語如此則於孫在豐等會議之時將此處應
行議出乃不行議出不合將靳輔交與該部議處可
也謹題奉

旨修理下河成功不在高郵州所有開壩而在乎堵塞

高家堰之壩并黃河南岸毛城鋪等處所有減水開壩
皆堵塞則黃河之水不流入洪澤湖如洪澤湖既無黃
河流入之水唯止有淮水將高家堰之壩暫行堵塞一
年後挑濬下河方得有益 二十三日工部等衙門會
題該臣等會議得先經臣等詢問總河靳輔閉塞開
壩挑浚下河之處議奏奉

旨云云仰見

聖心溯流窮源之至論謂下流之水由於上河而開浚
之功務詳啓閉面詢廷議諄諭河臣若能暫閉上流
庶可施工下水誠見

聖謨洋溢

行水金鑑卷一百三十六
睿鑒高深豈唯七州縣生靈亟除昏墊將見億萬年偉績立奏平成

敕下詢問靳輔據稱高郵州閘壩關係高家堰隄壩此處仰見

皇上睿鑒甚明高郵州五壩之內三小壩自正月堵塞至四月初一日啓二大壩自正月堵塞至六月初一日啓將高家堰所有古溝唐埂二座減水壩亦自正月堵塞至四月初一日啓并四座減水壩自正月堵塞至六月初一日啓黃河南岸減水壩一座閘八座俱暫堵塞一年等語應將高郵州南減水壩五座并高家堰減水壩六座俱令照所定之限堵塞黃河南

岸減水壩一座閘八座應令暫堵一年侍郎孫在豐等先稱將海口所有石碇白駒丁溪等處估計興修次第題報等語應請

敕下孫在豐等作速興修可也奉

旨下河工程今年著止將高郵州大小壩及高家堰閘壩照靳輔等所奏定限堵塞令孫在豐等挑濬海口其黃河南岸閘壩著于來年堵塞一年併高郵高堰等閘壩俱仍照見議限期堵塞令其預先備齊工料人夫自今年十二月興工挑濬下河勿致違悞

河防志

是年七月十五日靳治豫奉

旨來至淮安清江浦寓署口傳

上諭高寶一帶下河朕自閱工時目擊水勢情形之後
無刻不念此昏墊災黎爾父主築隄之議固是但凡事
須順人情且恐水中築隄工程不易如得除水患三四
分使民受三四分之益朕心亦可稍慰今作何說法修
治有何意見爾可問明爾父來奏

新文襄公治河書

聖祖仁皇帝康熙二十七年四月十八日以河工事召

滿洲大臣學士等滿漢九卿詹事科道等及往看中

河官員令入

行宮

諭曰前于成龍奏云靳輔開中河無所裨益甚為累民
河道已為靳輔大壞令凱音布往看中河云現有商賈

船行不絕若塞支河之口則駱馬湖支河之水匯流中
河水勢現大漕艘可通于成龍又奏王新命曾向伊云
靳輔從上河放水今若以此問王新命王新命其肯任
受乎前召九卿至乾清門會議皆畏懼于成龍無一人
敢與辨難悉順于成龍之說以河務盡為靳輔所壞矣
惟朕獨與衆人異謂靳輔不為不盡心于河務若云靳
輔治河不善全無裨益即靳輔亦不心服朕未親至下
河不甚深知若上河則自宿遷至清河之兩岸河底及
高家堰以至廟灣并運河諸處朕皆洞悉數年來河道
未嘗衝決漕艘亦未至有悞若謂靳輔治河全無裨益
朕亦不愜於心矣于成龍在直隸愛民緝盜居官頗優

故賜以朕所親御黃鞍馬匹復賜銀一千兩但懷挾私仇阻撓河務殊為不合朕非欲起用靳輔祇以河工所關甚大耳今九卿已將靳輔議罪皆言其治河無益若王新命聞之亦必順從于成龍之說以靳輔所治不善因將原修之處盡行更改是伊等各懷私忿遂致貽誤河工可乎且使黃河自宿遷以下衝決猶可修治若宿遷而上或致泛溢則為害甚大所關非小元時曾因挑河致生變亂今據凱音布等奏稱中河漕船募天顏勒令退回支河之水不許閉塞募天顏如此阻撓深為可惡著即提拿夾詢問誰唆使自然真情畢露此等之人不嚴加懲治不可也今應遣明悉大臣看閱將作何修

治之處詳確定議前者令馬奇前往俄羅斯但尚有同遣大臣馬奇著停其遣往此看閱河道著圖納馬奇張玉書前去其漢軍漢人官員尚應添遣爾等開列具奏伊等前往須將毛城鋪高家堰等地方徧閱就靳輔所築之處甚善而斷不可改者有幾不善而應更治者有幾著詳悉商酌定議以聞朕素不食言亦不為異日無驗之語向岳州洞庭湖進剿戰船衆議謂宜撤回朕議船隻不可退返岳州之役萬一疎虞則各處皆危朕確然堅定卒致成功靳輔以丈出民間餘田作為屯田及阻抑開浚下河其罪誠不可逭至有言黃河底漸高此斷不可信譬之盆內貯水遇風且溢出使黃河底果高

一有風濤其有不漫漲橫流決隄潰岸者乎爾等明晨速往同九卿會議具奏

河防志

是年夏大雨水中河水漲隄四決淹治內糧田數千頃漂没人畜不可勝計

清河縣志

十二月十三日總河王新命題奏河道關係運道民生水勢從來變遷不一以致上厯

聖慮躬親閱視宵旰經營多方指授黃河始歸故道日見安瀾順流復令將挑中河以避黃河之險溜以利運艘之飛輓實為萬世永賴之平成臣以庸愚謬蒙殊恩備員河道往來確勘唯期仰副

聖明於萬一查工部等衙門會覆張玉書等欽奉

上諭一案於開壩之應留應塞工程之應舉應停河口之應挑應濬詳悉確當誠如所議臣已檄行河道各官逐一遵行外至攔馬湖洩黃水之壩應否閉塞奉有著臣詳看議奏之

旨臣欽查攔馬湖洩黃水三壩原以宣洩黃河異漲之水今若永行閉塞恐黃水異漲宣洩無路不無衝漫之慮似應仍留如遇黃水異漲隨機開放以保隄工如水勢平緩則行暫閉以免中河淤澱與黃河縷隄內外汕刷之虞再駱馬湖減水壩三座議留二座於隄內減水入中河留一座在遙隄之外又以中河逼近黃河而運河駱馬湖水俱入此河河窄不能容納

行水金鑑卷一百三十六
令於中河往東蕭家渡楊家莊新莊口有黃河衝決
入海舊河形之處量建減水壩三座減洩臣愚以爲
既以運河駱馬湖俱入中河河窄不能容納是此駱
馬湖二座減水壩之水爲無用何必又留此三壩之
水減入中河復於蕭家渡等處建壩減出多此一審
周折况查舊案建一減壩所需不下一二萬金不等
似不若將此三座減壩俱留遙隄之外令由舊河形
入海於蕭家渡舊河形三處量留缺口二處用竹絡
裝入石塊酌水勢之高下堵塞宣洩以免衝漫以省
錢糧之爲妥也又以支河口議令閉塞於隣近建板
閘一座隨時啓閉但查支河口乃北運河會同微山

湖荆山口彭河沂河沭河白馬等河並鎮口閘之水
流入黃河之口一板閘至大不過二丈四尺以二丈
四尺之板閘豈能宣洩北運河之水勢必衝漫似不
若照舊聽其通流若彼年水勢充足則不必閉塞如
水勢淺阻則建草壩閉塞令其全入中河以濟運俟
糧艘過完即行啓壩循舊入黃以免衝漫淺阻之爲
便也又駱馬湖入黃河之口令臣驗明建減水壩二
座臣於十月初二十十一月初三等日水落之時兩次
親驗隄外湖口寬一百餘丈深五六丈以致二丈三
尺不等若迎水建減水壩則汪洋浩瀚無從下手若
迎水下埽築隄再於兩隄頭建減水壩則全湖排山

之勢似非埽隄減壩之所能禦必致衝壞且一隄兩壩所費不下數萬金是年修年壞徒以有用之金錢填無窮之巨浸而究無底止也臣愚以為不若於兩隄頭暫用埽料堵塞黃水淺深用高出水面二三尺大竹絡裝石下於臨河外面旁依草埽挨次排列數層兩面再用密排椿夾持水小則逼水入中河以濟運水大則由竹絡上下以洩水所費少而工程易似尤可以省歲歲修理之金錢臣現在責令該管官極力舉行再查駱馬湖原止匯沂河白馬湖運河微山等湖泛溢之水會入黃河未有如今日之洶湧緣鄆城之東十五里舊有沐河自山口流出西行約有四

五里轉而南沿紅花埠峒崕一帶復東由沐陽入海鄆城之東八里許迎沐水之口有名釣魚臺又俗名禹王臺者相傳大禹治水引沐水穿山而西恐其害鄆故築此臺以遏水勢及明季變亂遂毀臺取石修城以致數年來沐水西流由鄆城城北會白馬湖沂河等水入駱馬湖不唯沂鄆邳宿嶧各州縣歲受淹沒之害而駱馬湖黃河亦添一沐河之水愈覺泛溢奔騰而不可遏考之記載甚明詢之土人最確臣復親勘沐河故道斷流而禹王臺水口之水涓涓不絕似應於禹王臺舊基處所迎水亦用竹絡裝石堵塞內築土隄斷流令其照舊由故道入海非但駱馬湖

黃河之水勢得以減殺而鄆沂邳宿嶧各州縣亦可免淹沒之患矣再歸仁隄五堡減水壩被水衝壞議令修理堅固但臣會同查勘切近五堡之格隄尚有官路河口約二三十丈亦在過水而六七八九堡倒壞漫溢之口不止一處若止修五堡減壩而各處不修仍為無益且歸仁隄土工石工約長一萬餘丈廢壞多年非數十萬帑金可以修築之工程似不若暫停以損無益之費也奉

旨這本內事情著隨來諸臣確議具奏

河防志

卷第百三十六

行水金鑑

卷第百三十七

運河水

聖祖仁皇帝康熙二十八年正月二十九日

駐蹕瓜洲陳家灣地方奉

上諭高郵州南北一帶殘缺甃石工程著修理 二月二十五日工部議修理下河具題一案桑格捧出原疏轉傳

上諭著扈從諸臣議奏 會議得先經工部具題內開侍郎凱音布疏稱挑浚串場河並丁溪草堰白駒石碓及車兒埠下滔子河起至苦水洋之處俱照凱音布所題令其挑浚等語查近差侍郎徐廷璽巡撫于

成龍看閱下河具奏之處工部議自丁溪至白駒有
通海之口三處計三十七里應令商人挑濬其餘地
方及石碇俱行停止等因繕寫摺子具奏應將串場
河石碇無容再議外其丁溪草堰白駒等河先經于
成龍孫在豐俱稱應挑其凱音布亦題請挑濬應將
此河仍令挑浚又自滔子竈挑至苦水洋之處詢問
侍郎徐廷璽巡撫于成龍據稱河塋場河水流入苦
水洋丁溪河水亦流入苦水洋且滔子竈上有歸入
丁溪場之馮家壩小河一道相隔七里餘如將此處
挑濬則河塋之水可由丁溪流入苦水洋等語應將
凱音布自滔子竈挑至苦水洋三十二里之處停止

將近丁溪之馮家壩河道令其挑濬其餘俱照凱音
布所題再查上河爲下河之本源互有相關之處若
令交與侍郎凱音布挑濬恐各籌所司之事反致誤
工亦未可定今責成一人總理督修則上下河道可
以兼顧相應將下河事務交與總河王新命務期速
行挑浚完工以仰副

皇上愛民至意其凱音布挑河見用錢糧令交明王新
命後回京可也奉

旨依議 三月初三日奉

上諭朕前閱中河初疑其狹隘今行經丹陽閱視河道
亦復狹隘又聞衆官民俱言中河挑濬有益所關甚大

行水金鑑卷一百三十一
爾等會同總河總漕確議具奏 初八日該臣等會議
得從前挑浚中河原避黃河一百八十里之險且收
束散漫之水使不致淹沒民田看河諸臣亦疏稱若
行中河則一百八十里之險可避止因黃河逼近不
便挑寬等語今我

皇上南巡省視民生經過丹陽又見與中河寬窄相等
詢訪官員百姓

命臣等會同總河總漕確議具奏仰惟

皇上從前諭旨原欲收束漫溢之水拯救被災之民使
淹沒田地得以涸出故前任總河靳輔挑浚中河今
水勢業已收束且避險就易於民生漕運甚有裨益

應將中河無容另議其駱馬湖口先經尚書張玉書
等看河之時題修減水壩二座今王新命稱丈量水
深二丈有餘難以建壩且需錢糧甚多應停其建築
編竹簾以盛石塊高出水面二尺成造堵塞若水大
可以浮面洩出等語又支河口先經張玉書等疏稱
建造板閘一座應令隨時啓閉今王新命稱若建閘
水大之時必致衝決應停其建閘留出水之口於南
隄下埽堵塞等語此二處建閘修壩用竹簾下埽減
洩溢水與看河諸臣所題其理無異但照總河王新
命議建造修理所需錢糧減少應照王新命所議建
造又駱馬湖減水三壩先張玉書等疏稱將二壩之

水令流入中河其一壩之水留在遙隄之外令流入海今據王新命亦復稱善應照張玉書所題又張玉書等稱裏運河駱馬湖之水俱入中河河窄難以容納應於北隄建修減水壩三座今王新命稱若欲建壩所費錢糧必多應停其建壩亦用竹簍以盛石塊堵水若有大水可以減洩等語先張玉書等欲建壩減水今王新命用竹簍盛石減水俱係洩水之意亦照王新命所議修造可也奉

旨依議 八月十五日工部題覆總河王新命疏稱儀真四閘蒙

皇上聖明洞照加意運道民生行令修理臣查新河口

之北新洲原係江心長成之沙今欲挑挖成河從來未經試驗之事可否挑成難以預必即挑成之後果否不復淤長尤難逆料且糧船皆由一閘經行未見阻滯所有一切重運似應仍照歷年由瓜洲閘入運河其儀真挑洲開河并修理四閘俱應暫停飭令量爲修葺以利回空船隻俟沙洲變遷可以通漕之日再行興修等因前來查先經原任總漕慕天顏將瓜儀二閘題請大修臣部議行新任總河親詣確勘作速具題到日再議等因具題奉

旨朕前巡行江南經過儀真地方見水淺閘壞行船艱難俱宜修理著再議具奏欽此臣部議行河臣王新命

將儀真瓜洲二閘作速修理等因具題行文在案今該督雖稱北新洲原係江心長成之沙今欲挑挖未經試驗糧艘皆由一閘經行未見沮滯儀真河路并四閘暫停使各省漕船盡由瓜洲一閘進口勢必長江內漕船頂阻守候以致遲誤亦未可定應請勅下總河總漕江南江西總督會同確勘定議具題到日再議可也奉

旨儀真河閘關係運道著河道總督會同江南江西總督漕運總督詳閱定議具奏今據總河王新命會同江南江西總督傅臘塔漕運總督董訥疏稱儀真牯外江口北新洲一帶俱係乾涸而北新洲之外又有沙

漫洲過水不過二捺餘橫亘二三百丈難以築壩若自沙漫洲尾從北新洲腹內向東北斜開引河以通四閘不能保無坍淤似應仍挑北新洲舊河身直通四閘一切糧艘令循沙漫洲尾轉入新河口可以通行其日久或有淤阻之處聽河臣酌量挑濬所有應挑土方并修閘工料銀兩聽河臣確估等因前來查儀真河口關係運道民生今河道總督等會同詳閱仍挑北新洲舊河身直通四閘一切糧艘令循沙漫洲尾轉入新河口可以通行等語應如該督等所題交與總河挑濬修理其挑河修閘所需工料銀兩應令總河確估具題可也奉

旨依議

河防志

聖祖仁皇帝康熙二十九年總河王新命奉

上諭河道關係最為重要已前一二年雨水鮮少河道官員必將河務視以為常事今年景象雨水似多應行文總河著嚴行曉示所屬官員無分晝夜防守務使河道不致有危

山東兗寧道冊

十一月十一日總河王新命題奏丹衛河道情形竊照臨清以北一帶運河每歲重運經臨歷多淺阻因考有河南小丹河可以通流入衛濟運曾經題明親往看驗在案臣於十月初七日自清江浦起行循河而至河南懷慶府河內縣細閱丹河發源太行山至

丹河口分渠九道大丹一河直歸懷慶沁河其餘六渠民間引水種竹溉地約計一千四百餘頃止小丹河上秦河二渠灌溉所餘之水涓流通衛臣仰體

皇上漕運民田均關緊要之至意諭令所在紳士耆民於每歲三月初用竹絡裝石橫塞八河渠使水歸小丹河入衛以濟漕留涓涓之水以溉地至五月盡重運過完則開八河渠用竹絡裝石塞小丹河口以防山水漫溢士民咸為稱便其小丹河經修武獲嘉以達合河鎮之處若有淺阻責令印河各官量為疏濬至輝縣棚刀泉在縣西北五里蘇門山下清水一泓約二十餘畝泉珠上湧難以數計即詩經所詠泌彼

行水金鑑卷一百三十四
泉水也民間設立五閘蓄水灌田約三百頃往例於五月初一日封板放水濟運唯是五月正當農人需水之時未免有妨農務臣親行看驗閉板始可通渠灌田啓板則泉流直瀉各渠立涸應亦用竹絡裝石量渠口之高下堵塞使各渠之水常盈而所餘之水晝夜長流以濟運其萬金渠出自彰德府安陽縣西南六十里善應村山下約二十餘里至高平村昔人建牆開渠引水溉彰德府西南東三面地約計百頃仍由彰德府東北五里許入安陽河其牆二門閘門高不過三尺寬不過一丈臣親行啓驗一啓板渠即斷流未免有妨農務亦應照五閘之法用竹絡裝石

塞閘通渠漕民兩便士民莫不懽欣頂頌

皇仁再今重運不由黃河俱由中河以上較昔甚早五月封板之議相應停止臣復循衛河至臨清由水路抵甲馬營等處節節查驗凡有淤淺處所俱經責令地方官大加疏浚所河防志微臣查看過丹衛河道各情形理合題報

聖祖仁皇帝康熙三十年四月初七日工部會議得河南巡撫閔興邦疏稱衛河并丹河萬金渠閘作何開塞有益漕運民田奉

旨行臣確定到日再議臣隨親查丹河源發晉省流入黃河因百姓開渠灌田外又開大渠直達運河始有

小丹河之名也前河臣王議用竹絡裝石塞渠濟漕留涓涓之水溉地誠為得計但今重運俱由中河北上較昔甚早如雨水勻足照河臣所議用竹絡裝石塞口濟運灌田倘遇亢旱請每年三月初一日起至五月十五日止令三日放水濟漕一日塞口灌田以後聽民使用再糊刀泉乃衛河之源建立五閘蓄水灌田每年五月初一日封板濟運但五月正民間需水之候應照河臣所議用竹絡裝石堵塞使泉水直流濟運餘水灌田至萬金渠水自高平村建閘門渠灌田之後仍歸洹河暢入衛濟運亦應照河臣所議用竹絡裝石塞閘通渠以便民漕等因前來查該撫

既將衛河丹河萬金渠親詣勘明確議具題應如該撫所題將丹河如遇雨水勻足之年用竹絡裝石塞口濟運灌田倘遇亢旱之年每年自三月初一日起至五月十五日止令其三日放水濟漕一日塞口灌田以後聽民使用至衛河五閘萬金渠閘亦應如所題用竹絡裝石塞口濟運灌田俟

命下之日知會總河可也奉

旨依議

河南管河道治河檔案 凡天下河道通塞關乎水利唯獨江南漕渠重行運則不能兼濟民生 康熙二十三年翠華臨幸見下河管墊多方拯救至今讀其 恩綸猶令人感激涕零閘中丞疏言丹衛萬金渠閘而以濟運灌田並行不悖 俞旨允行 君都臣俞何啻唐虞聖世哉

聖祖仁皇帝康熙三十一年二月初二日工部題奏臣等議得戶部侍郎博濟等疏稱高郵州等處減水壩

九座內有八里鋪車邏鎮二壩底石被水衝損其古溝東減水壩底并北二壩底衝損之處均應令堅固修理高郵州以南五壩應仍照原定限期開放永安隄改下竹絡尚有未完應速行修完瓜洲閘二座月河一道儀真閘四座運河一道俱係新工北運河東隄舊減水壩三座新修竹絡減水小壩六座俱係建造以防異漲東隄兩面所下之埽朽爛西隄殘缺單薄取土甚難且於運河無害似應暫緩東隄迎受河水關係運道應於隄岸排椿之間下埽修葺駱馬湖所建竹絡壩中段被水衝壞若於湖口上流百丈許東挑月河一千餘丈西挑月河一千餘丈分殺湖水

於中河似有裨益支河口東水壩迅流無阻中河北岸減水壩二座攔馬河減水壩六座俱係建造以防異漲中河見今漕船經由甚便禹王臺所建竹絡壩一段土隄一段堵塞入駱馬湖之水今由沐河下海於中河有益下河丁溪草堰白駒新建閘座始行興工車路引河尚未挑完應速行修建其岡門河水迅流無阻等因前來查侍郎博濟等公同確勘既稱瓜儀閘河俱係新工北運河攔馬河中河減壩俱係建造以防異漲支河口東水壩并岡門河水迅流無阻中河見今漕船經由甚便等語俱毋容議外其餘應行培築修造閘壩隄工并挑月河之處均應如所題

行令總河於歲修內動支錢糧作速堅固修理工完
造冊題銷再疏內稱運河西隄殘缺單薄又稱取土
甚難且於運道無害似應暫緩等語但運河關係重
要應否暫緩之處應令總河靳輔親詣確勘定議具
題到日再議可也 十一月二十四日奉

旨中河張莊運口築隄建閘等情著河臣將工費估計
題到再議具奏

河防志

聖祖仁皇帝康熙三十三年築中河兩岸束水隄 是
年修廣濟閘在治西仲家莊舊名仲家閘至是修之
改今名

清河縣志

聖祖仁皇帝康熙三十四年建永濟閘在甘羅城南太

山墩北與惠濟閘相望亦通漕運又建康濟閘在治
東陶家莊右又建雙金門閘在廣濟閘北鹽河內又
建小閘在雙金門閘北

清河縣志

聖祖仁皇帝康熙三十五年正月內河撫李國亮題爲
恭請改復等事奉

旨該部議奏部臣等查得河南巡撫李 疏稱豫省漕
廠水次舊設衛輝府北門外嗣因監兌部員駐劄直
隸大名府小灘鎮隨將漕廠移於彼地相沿至今上
年十一月間臣親詣視漕確勘細探衛河一帶舊爲
行漕故道直抵通州見今商賈船隻往來不絕漕艘
亦無阻滯合無仰額

皇仁允賜改復衛輝兌運水次以本省之銀買本省之米就近盤剥實為至便但老鸛嘴地方有大石二塊相去五里橫卧河邊中間率多碎石平常水勢本自無妨偶遇最淺之時應仍就小灘鎮購買庶民便通融而糧無貽誤查該撫既稱小灘鎮水次改於衛河水次以本省之銀買本省之米就近盤剥實為至便應如該撫所題改於衛輝府水次毋致阻滯兌運可也奉

旨依議

河南管河道治河檔案

聖祖仁皇帝康熙三十六年十月十五日大學士伊桑阿等面奉

上諭下河地方久罹水患朕心時切軫念前命挑濬白駒岡門等口原欲使水盡通流田皆涸出今見興化泰州等州縣積水尚多田仍淹沒民生甚屬苦累著行文總漕總河親往會勘將下河積水何故壅塞不能迅流應作何盡令歸海涸出民田之處一一詳閱議奏
十
一月初三日總漕桑格等會題該臣等看得下河為洩水入海之區自淮安以至邵伯鎮計運河東岸共有涵洞三十處閘十座滾水壩八座此皆運河及高郵邵伯等湖之水由諸涵洞閘壩等口歸入射陽廣洋等湖就下流以至白駒岡門等口入海總由下河受水之處甚多而洩水入海之口猶少是以水勢汪

洋易於停蓄在雨暘時若之年水循故道田猶無恙
唯去歲及今兩年夏秋霪雨異常諸河泛漲以致水
勢洶湧通流不及瀾漫四散而下河之高郵寶應泰
州興化鹽城廟灣等處地皆窪下均受其災興化地
方更低積水尤甚蒙我

皇上念切民生特頒

俞旨令臣等詳閱下河情形將積水壅塞不能迅流之
處作何盡令入海涸出民田真我

皇上已飢已溺之懷而百姓無不共仰如天之德者也
臣謹欽遵沿河踏勘詳閱洩水諸口除廟灣岡門白
駒三口水頗暢流無庸置議及興化通丁溪草堰白

駒之車路白塗海溝引河三道并射陽湖下海之蝦
溝鬚溝朦朧院道港又高郵湖通邵伯湖之曹家灣
湯家絆七節橋目今水未全消不分隄岸無由勘明
必須水落確勘再將應行疏浚情形另疏請

旨外今將臣等閱明亟宜疏浚各口及應建閘之處爲
我

皇上陳之 一高郵湖之水勢宜分也查邵伯鎮南有
金灣三閘閘南有金灣滾水壩一座三閘之水由人
字河入芒稻河下江其金灣壩外原無引河今議於
壩外挑引河五里通人字河將高郵湖之水引入邵
伯湖由金灣閘壩同歸人字河入芒稻河下江其人

字河計長十八里見今淺窄應加挑浚又芒稻河原有舊閘二座西閘六門東閘三門今俱損壞應加修建如是不但邵伯湖水不至下河高郵湖水亦可分洩而下河受益矣 一車兒埠入海之口宜開也查泰州河壩場有車兒埠口其上流乃高郵漫漲之水及興化梓新河之水均至河壩場之老壩匯流於車兒埠口以至不能宣洩今議將車兒埠口至姚子窰四十里河身淤淺應加挑浚姚子窰至苦水洋三十餘里間有河形應加開導入海其車兒埠口老壩兩處各應建閘一座以備啓閉而泰州之民田受益矣 一丁溪入海之口宜通也查丁溪閘口至撈魚港

六十餘里河勢深通無容疏浚自撈魚港至苦水洋七十餘里河身淤澱若循舊河挑浚其河勢甚平不能迅流費帑無益今相度情形議於撈魚港之北就近直挑十四里即入王家港下海而丁溪入海之水疏通矣 一小海場入海之口宜開也查小海場有一河形原係洩水入海故道年久淤塞今議於小海河口建雙金門石閘一座自牯口起至鄧家窰計長四十里應照舊河再加挑深自鄧家窰起至姚子口計長二十里雖舊有河形然地勢紆迴宣洩不暢今相度情形自舊河北岸鄧家窰起向姚子口就近直挑十里以入舊河再自姚子口以下將舊河挑浚十

餘里會入鬪龍港下海而興化又增一洩水之道矣
一草堰場洩水之閘宜增也查草堰入海之道雖
暢但因只有閘口一座兼之窄小上流水大不能一
時宣洩常至漫溢今議於舊閘之上添建一閘下挑
月河七十丈則上流無壅阻之患矣 一運河之水
勢宜分也查淮安城南運河東岸有興文小閘一座
此閘係分洩運河泛漲之水流入澗河由射陽湖下
海見今澗河淤淺兼之閘門窄狹水不暢流今議將
閘門改闊并將澗河八十餘里再加深浚以洩運河
之水則運河之水不至高郵而興化等處更有裨益
矣以上各條皆臣等詳閱被災州縣積水壅滯不能

迅流情形妄抒愚見以爲分洩各水入海涸出民田
之策是否有當伏乞

皇上睿鑒施行奉

旨工部議奏 部議奉

旨九卿詹事科道會同速行確議具奏

淮揚道治河檣文亦

行水金鑑

卷第一百三十八

運河水

聖祖仁皇帝康熙三十七年六月十四日戶部爲欽奉
上諭事會議得協運河南省漕糧任城等八衛運丁張
文安等叩

聞狀內河南漕糧原在直隸大名府小灘鎮交兌每漕
糧百石給盤剝銀一兩五錢於康熙二十二年河南
漕糧改折停運後於三十二年復運漕項錢糧俱照
舊例支給其盤剝銀兩亦照舊例應給發濟運經今
五年並未支給遇淺俱係各丁血賠苦累已極今水
次改遷河南衛輝府不惟路遠千里更有崎嶇山河

盤淺過溜較之江南倍加苦累而江南漕糧每石給耗米四斗三斗不等及至抵壩俱是二五起交身等升兌升交伏乞

皇上軫念窮軍積苦討給盤剝銀兩照江南定例分別遠近加耗等語又呈稱河南漕糧原在直隸大名府小灘鎮兌運後原任巡撫李題準改在衛輝府路途遙遠山河崎嶇輓運甚屬苦累請將水次仍改歸小灘鎮等語查豫省盤剝銀兩於康熙十六年間因軍需浩繁裁減充餉二十二年豫漕改折停運後於二十九年經原任倉場侍郎凱等題請復運九卿會議漕船各項錢糧俱照舊例遵行等因具題行文在案

今旗丁張文安等既稱盤剝銀兩歷經五年並未支給遇淺俱係各丁血賠苦累已極等語應將前項銀兩準其復舊將通濟庫銀兩支給俟運糧之時將該省應支原款動給再查康熙二十五年三月內原任巡撫李以衛河一帶為行漕故道直抵通州現今商船往來不絕漕艘亦無阻滯請將水次改復衛輝府但老鸛嘴地方有大石二塊相去五里橫卧河邊中間率多碎石平常水勢本自無妨偶遇淺時仍應在小灘購辦等因具題臣部覆準應如該撫所題改於衛輝府水次毋致阻滯兌運等因行文在案今旗丁張文安等既稱漕米自衛輝府運送路途遙遠山河

行水金鑑卷一百三十六
二
崎嶇輓運甚屬苦累應仍改小灘兌運如此照舊改
運路途近便應將所請照江南例加給耗米之處毋
容議可也奉

旨依議

河南管河道治河檔案

是年七月二十六日九卿詹事科道會議得先據總
漕桑格會同總河董安國疏稱邵伯鎮南金灣壩下
挑引河直通芒稻河開曹家灣湯家絆七節橋挑浚
車兒埠口至朱家竈挑河小海場至王家港挑河興
文閘至流均溝挑河草堰建草壩挑月河車兒埠口
小海口二處各建草壩并修建芒河閘興文閘共估
銀一十九萬二千兩等因又據總漕桑格疏稱白塗

河橫挑三十餘里并入車路河其車路河自唐子鎮
起至新莊止淤塞十餘里海清河自鮑家莊起至白
駒口淤塞七十餘里海陵溪自禹王廟起至仲家寨
淤塞四十餘里蝦鬚二溝戛梁河共淤六十餘里朦
朧西首之射陽湖淤塞四十餘里挑浚通共約計銀
二十五萬餘兩所費甚繁不敢輕議動帑臣欲倣直
隸挑河之例開一事例令其挑浚等因前來查下河
岡門丁溪草堰白駒等處康熙二十六年經原任侍
郎孫在豐挑浚二十八年又經原任總河王新命挑
浚積水並未入海徒費錢糧或係海口高阜而內河
低窪以致積水不能出海亦未可定應行總漕總河

會同江南總督江寧安徽巡撫如照此挑浚下河積
水果能入海田地果能涸出有益民生江海有無倒
灌之處逐一確勘定議具題到日再議可也 十月
十一日總漕等會勘得下河各州縣地方歷被水災
歲無寧土者皆由上源受水之處甚多而洩水入海
之處甚少兼之各邑通水故道俱多淤澱以致泛濫
橫溢成此積水之患也今欲救此巨災舍開浚故道
多分水勢之法別無善策是以前疏內議修芒稻河
者欲分高郵邵伯兩湖之水入江使不至下河也議
挑曹家灣湯家絆七節橋者係開通高郵邵伯兩湖
淤塞之水路使通芒稻河以下江也議挑車兒埠之

潘子河者欲使泰州所受之水由苦水洋入海也議
挑澗河者欲分運河之水流入澗河由射陽湖下海
使不至高郵也議挑海陵溪者欲使高郵所受之水
通岡門下海也議挑車路白塗海溝三河欲使興化
所受之水由丁溪草堰白駒入海也議挑蝦鬚二溝
戛梁河并朦朧西首淤塞之射陽湖者欲使高寶興
泰鹽山等處之水俱由廟灣下海此海口爲下河最
窪最寬之地洩各處上流之水尤爲宣暢也今臣等
逐一細加覆勘與前無異毋容更議唯是九卿會議
所云江海有無倒灌之處臣等細察各處海口以及
江口皆係歷來洩水之舊跡而臣等所議挑建諸工

行水金鑑卷一百三十八 四
皆內地淤阻之河道照舊開通使水得達於口瀉之
江海並非新開江海之口自無倒灌之虞至於會議
所云或係海口高阜內河低窪以致積水不能出海
如照此挑浚下河積水果能入海田地果能涸出有
益民生等語臣等閱歷形勢海口較之內河終屬低
窪見在洩水而目今水勢尚在汪洋民間被淹田地
多未涸出者皆由諸河水道淤塞不通之故若使前
議挑浚之工一舉水得循其故道自必下流歸海田
地自當涸出實為大有益於民生 十一月初七日
該部議覆奉

旨挑下河事關係民生朕軫念民生先經交與凱音布

孫在豐于成龍王新命等挑過伊等已俱挑完大有益
於民生等因具題檔案俱在部可查人俱在可問今看
來俱徒糜費錢糧並無水涸田出有益於民之處今桑
格等又稱應行挑浚具題九卿不問明先經挑過之人
不查檔案即議準行如果此番挑浚果能水涸田出有
益民生朕不惜錢糧即發庫銀興工捐納事例斷不可
行見在山西捐納銀米事例尚未明白桑格等如果將
下河照伊等所題挑濬即能水涸田出有益於民將伊
本身家產出具保結即準挑浚此事監察御史吳甫生
亦經條奏將吳甫生條奏事宜一并發還九卿問明先
經挑過之人閱查檔案確議具奏 二十六日九卿議

覆奉

旨朕於南巡詳閱黃運兩河形勢凡疏濬修築事宜俱面為指示河道總督于成龍等令其遵行已有旨了

聖祖仁皇帝康熙三十八年三月初二日

上諭戶部朕君臨天下期於黎民樂業各獲其所凡興利除害之事靡不舉行蠲免賑濟之恩靡不下逮比年以來因淮揚所屬地方疊罹水患業已歲蠲額賦調卹頻施又動支數百萬帑金責令在河諸臣於應挑應築之處酌量修理務使汎濫之水漚歸入海被淹之廬舍田畝盡皆涸出用底幹寧乃錢糧竟爾虛費卒不能使積潦有歸田廬未涸民生未遂朕聞之惻然軫懷值茲

四方無事之時欲將一切修舉事宜詳閱指示用是躬親臨幸沿途審視黃河水勢咨訪地方父老比至歸仁隄高家堰量度地形高下應挑應築之處已經一一明示河臣惟是被淹地方米價翔湧生計維艱朕目擊民依深用厯念著將漕糧截留十萬石於高郵寶應興化泰州鹽城山陽江都受災七州縣各留一萬石悉較時價減發糶餘米三萬石著於邳州留八千石宿遷桃源清河安東四縣各留五千五百石亦照時價減糶此各州縣發糶之米著就近交與漕運總督邳州著遣司官一員前往監視再截留米十萬石於揚州淮安各收貯五萬石這應留漕糧不論何處米石著就近截留爾部

即遵諭行特諭 初三日

聖駕看閱黃河隄岸傳

上諭王公隄甚屬險要務須加幫高寬修築堅固 初

六日奉

上諭諭河道總督于成龍朕初五日自淮安起行沿途細閱河隄除河底已高東邊甚窪毋庸置議外朕所駐蹕界首鎮前湖邊用水平測算河水比湖水高五尺八寸揆此湖水似不能越此隄而入運河前往高郵未知若何但當湖之石隄雖被水汕壞朕公同細閱被人搬去損壞之處亦復不少此固屬要工修築亦不甚難爾差賢員作速查驗應即僨工修築嗣後查閱工程有應

修築之處照此頒旨特諭 十一日歲貢馬泰轉傳

上諭朕自淮安一路詳閱河道測算高郵以上河水比湖水高四尺八寸自高郵至邵伯河水湖水始見平等應將高郵以上當湖隄岸修築堅固高郵以下河之東隄亦應修築堅固有月隄之處照舊存留有應修隄岸仍照舊隄修築堅固至於邵伯地方因無當湖隄岸而河湖合而爲一矣不必修築隄岸聽其流行高郵東岸之滾水壩涵洞俱不必留用將湖水河水俱由芒稻河人字河引出歸江入江之河口如有淺處責令挑深如此條治則湖水河水俱歸大江各河之水既不歸下河下河不必挑修爾馬泰速行前去將朕旨轉傳于成龍

令其具本啓奏 四月初二日總河于成龍等奉

上諭山東采辦河工應用石塊爾即行文總河于成龍作速預運沿河兩岸俟回空糧船至日帶赴河工應用
二十二日河道總督于成龍等奉

上諭著將運河東岸隄工凡有石工殘缺者仍補修石工其土工隄內有水之處下埽幫築減水壩俱堵塞堅固用心防護越壩更屬緊要亦著加幫防護淮安府涇澗兩河必須挑浚深通毋任淤墊 又奉

上諭如有漫頂隄內積水之處即釘排椿幫築減水各壩俱著堵塞堅固隄防要緊凡有懶惰河官不留心防範者輕則即行懲處重則處後斥逐切不可姑容從事

致誤河工 又奉

上諭人字河若有窄狹處可以相機挑挖凡有需水舊口修砌涵洞令民灌田隄岸單薄處亦酌量加幫 二十四日總河于成龍等奉

上諭這運河東岸再加高寬再不必開減水壩其涵洞與金灣滾壩舊有河身民間用水灌田仍照例開放減水壩著河官堵塞堅固用心防守要緊至新加隄岸亦著爾帶來官員內選擇或五十丈或六十丈責令加意防守西隄土石各工亦上緊攢修高家堰亦速速修完下河田地不過一二年可以見出 又奉

上諭東岸有一段隄工修得甚好朕已給箭一枝執箭

說與爾知此等官若不獎勵何以服衆 二十八日奉
上諭于成龍爾回去即看歸仁隄高家堰清口甚屬緊
要徐廷璽著往揚州去往回查勘永安各石土并東西
岸各工與堵塞減水壩要緊將京中帶來各官每員或
五十丈六十丈逐名交給用心防守毋得疎虞 五月
初一初二等日隄起西風將高郵城北陸漫開西隄
一帶土工打通以致東隄新工浪汕殘缺至護城通
湖各口東隄亦被浪汕坍卸又城南車邏鎮起至江
都露筋止以及三溝間至邵伯鎮止原無西隄其東
隄新土浪汕入裏二三四五尺不等蕪城墩迤南一
帶東隄未完之處俱皆漫水 以上並河防志

是月十二日河撫李題爲豫省漕糧等事一疏奉
旨該部議奏 部臣等查得河南巡撫李疏稱河南省
漕糧原在衛河交兌後改小灘經臣視漕由衛登舟
查勘河流寬深從不淺澀此臣目擊親訪最確最真
惟是河南漕糧每歲起運二十三萬餘石承辦各官
擁集於隔屬小灘一隅數多期迫因而囤戶商牙百
般勒指抬價騰貴且豫省產米本多今槩赴外省辦
運而本地之米反致壅塞衛河夙爲行漕故道距小
灘雖有五百餘里而漕艘赴衛裝運係空船而上受
載開幫係順水而下輓運易於爲力且三十五六兩
年漕糧在衛兌運並無阻滯貽誤若就近小灘兌運

官民均有未便今旗丁盤剝銀兩俱已支給有何苦
累仍復衛輝兌運豫省官民更永沐

皇仁浩蕩矣部議應如該撫所題仍復衛輝府水次毋
致阻滯兌運奉

旨依議

河南管河道治河檔案

是月二十九日總河于成龍等看得湖河水勢唯揚
屬長發隄工危險情形協理河臣徐廷璽專駐督催
原派人員并臣于成龍續委各員辦料募夫協力防
護緣由業經臣等題報在案今據淮揚道薛晉詳稱
高江境內湖河水長六尺餘寸值今五月以來每日
長水寸餘不等尚未平定西岸土隄多被風浪打通

東隄新築未完之處俱皆過水臣等隨行令該道親
勘督防外唯是揚屬運河減壩原與高堰唐埂徐壩
相為表裏蓋淮居上源而揚居下流所以兩處開壩
定例同時啓閉前因揚屬各開壩奉

旨盡閉而唐埂等處各壩未便全堵所以揚屬之水有
長無落臣等再三籌畫若高堰小黃莊迤南一帶石
工工程盡行償修一律完竣即將唐埂等壩亦俱閉
塞竭力防守或可免無他虞揚屬水勢自可消落但
目今高堰各工因錢糧不繼尚多未完若令各壩全
閉不但徐壩汛內受危即高堰高梁澗小黃莊等處
亦為可虞倘有疎失所關真匪渺小是以準令暫開

二壩實閉四壩在案至揚屬東隄雖至危急尚有金灣等壩爲之宣洩卽邵伯迤南東隄漫水俱歸入江與下河無碍又查東隄危險漫水處所亟應簽釘排椿行據委員估計前來臣徐廷璽見在親督各員照估修築務期速竣以資保固伏秋外所有揚屬水勢情形并見今修防緣由臣等具疏題報 部議覆奉旨依議速行今年運河滾水壩既經堵塞水勢洪大勢所必然該督著遵前旨不時謹慎防備務使隄岸堅固

六月十八日桑格轉傳

上諭運河黃河關係甚要今值夏季水漲之時應挑選賢能官員各處分守于成龍係有年之人來往巡查恐其不能現隨于成龍効力官員甚多將此內賢能大臣官員令于成龍酌量揀選幾員具題將高堰隄工運河隄工湖隄引河黃河危險之處俱照徐廷璽一樣將各處分給在工所住遇雨水之時不時巡查看守著差出工部賢能善跑章京一員明日卽行速去交與于成龍並將水勢情形看明回來本日尚書薩穆哈侍郎羅察差去員外郎費揚古具奏奉

旨好著前去 閏七月十一日總河于成龍等疏稱羅溝河卽名羅口發源東省雲蒙諸山各澗匯流而成沂河由沂郯而入邳境水從羅口分流出徐塘口而入運河其正河至隅頭集經入駱馬湖凡遇水發瀾

漫兩岸淹沒田廬沂河兩岸應築隄一萬八千一百八十丈羅口寬八十丈應建閘座以資啓閉則邳州兩岸之民可免沂河漲漫之患而此水之由羅口分汛者仍入運河以濟運誠爲兩利無害等因部議具題奉

旨依議

河防志

是年八月內總河于成龍等於欽奉

上諭事案內具題將清江大閘加高四層又將大閘北岸下雁翅倒卸十丈並越河閘東雁翅酥碎磚工十二丈一併改砌石工又將板閘開口埽工一百二十丈改建石工又將盤糧廳前埽工五十五丈淮城

西門外護城椿埽隄工三百六十丈改建石工又估挑澗河自興文閘起至劉均溝止長一萬四千零三十二丈八尺并涇河自閘下起至射陽湖邊止長八千二百五十丈頭石工頭磚工長三十丈中石工長一百五十七丈頭石工尾磚工長一百三十一丈二尺石工磚工長一百五十八丈磚工仍修砌磚工石工加高二層

裏河廳冊

是年九月初八日總河于成龍題奏竊照南運河乃糧船經由要津又居下河七邑上游更兼高堰六壩減出之水盡由草字河歷寶應高郵諸河而入於此水勢浩大河窄難容是以前河臣靳輔在於高郵南

北建設大小減水壩五座題明開放定例頻年以來
依期開放雖隄岸保固無虞而下河諸邑均受其惠
今春恭遇

聖駕南巡軫念下河災黎諭令臣等大修隄岸堅閉減
壩下河麥禾幸得收穫一遇伏汛水發盈隄溢岸以
致高郵九里邵伯更樓閭家涵洞皆被漫缺臣等於
特疏題明等事案內酌開壩兩座上下隄岸方得保
全總緣高郵河身與山陽寶應河身相等驟受高寶
諸湖滔天之水開壩則有害於民田閉壩則有傷於
隄岸欲其隄岸民田兩相保固難矣臣等往來查勘
再四思維唯將洩水減壩俱改爲滾水石壩水長聽

其自漫而保隄工水小聽其涵蓄以濟運道較之開
壩水盡東流閉壩徒費錢糧者相去不啻什伯也臣
等身膺督河重任敢不殫心竭慮仰副

睿懷倘蒙

俞允改建則運道民生均有裨益 九卿詹事科道議
覆奉

旨依議 十月二十日總河于成龍等題奏邵伯更樓
高郵九里等處漫決例應經管防守并承修各官賠
修但需料浩繁若令賠修恐各官綿力一時不能設
措難以驟告成功又致有誤重運所關非小臣今再
三籌畫莫若先借動帑銀刻期堵築勒限告竣俟工

完之日容臣核實照數追補還項不過先後轉移之間而工可速竣帑仍有著也臣再有請者除高郵九里缺口一工先行責令該管各官賠修堵築外其邵伯更樓決口一工隄下原係舊有涵洞隄內原有河形在平日隄工完整每歲水發之時西岸一片汪洋東岸淹沒甚屬危險是以今歲水漲以致漫缺即堵築完固恐難保守今臣等親詣斟酌估計工料若興工堵塞需銀甚多不若就此決口之下將舊引河疏挑寬深在於河東築做土隄束水南下入江可洩運河驟漲之水以固東西兩岸隄根較之諸決為費甚省不特無碍運行且將來水發可免漫漲之虞而邵

伯一鎮居民永為樂土矣 總河于成龍等覆題除酌改運口已經

欽差侍郎常綬會勘議覆請

旨 在案所有邵伯更樓河道乃行運要津今夏被水衝決見今水深四丈難以堵塞且費帑甚多經臣于成龍具奏將決口之下舊引河疏挑寬深河東築隄束水入江部議應如所奏令其挑築等因奉

旨 準行在案行據護理淮揚道裏河同知常維楨詳稱督同該廳等親勘決口迤東被水衝久河底太深難以越過即使水內築隄工程亦難驟起况新運在即若不急議堵塞恐洩水太過有碍運道今議將決口

西岸繞挑月河築隄并打攔河壩使水由月河改行而見在之決口日後自必掛口另議堵築不特省費亦可以濟目下運道之急共估用料物土方夫匠等銀四萬三千兩零俱係實工實料委無浮冒經臣徐廷璽親勘核明無異當經發帑委員照估償挑俟工完報銷既據該道詳估前來除原冊送部查核外理合具疏題估 部議奉

旨依議

河防志

卷第百三十八

行水金鑑

卷第百三十九

運河水

聖祖仁皇帝康熙三十九年二月二十四日總漕桑格題為題明事三月十五日奉

旨這邵伯更樓決口自去歲奏報後屢據奏稱僨工修築乃迄今尚未報完以致漕艘十有餘隻漂沒擊碎其阻滯江干及瓜揚一帶地方不能前進者甚多遲悞漕運關係重大在工官員所司何事怠緩延玩殊為可惡著嚴加議處具奏仍著該督設法倍料兼工堵築刻期報完勿致再誤邵伯更樓係船隻往來要地已經衝決十箇月有餘船隻阻滯不能前進之處桑格並不題報

至于成龍故後始行具題不合著一并察議具奏該部知道 三月初九日侍郎常綬口奏

皇上指示黃河挑引河打挑水壩于高堰管工大臣內交給某人修築之處恭請

欽點奉

旨著差出董訥范承勲承修令他們二人於捐修人內將捐銀多者揀選十人帶領修造爾等將邵伯決口月河芒稻河人字河亦俱著奏或堵塞黃水入湖之清口或閉塞清江閘之處會同徐廷璽議此係河官專責如已定即交徐廷璽修造爾等俱馳驛前去 十四日河道總督臣張鵬翮恭聆

天語朕親書河工事宜二條差筆帖式馬泰交與于成龍你到衙門查看就知河工流弊早已知有今日豈至今日而始言也 臣鵬翮到清江浦詢筆帖式馬泰檢出

御書上諭一條由清字譯出係康熙三十八年七月初三日

上諭諭河道總督于成龍画河圖去的董殿邦等于七月初三日到來問你身上好麼伊說你臉色甚瘦如今你身上好了麼飲食如何再細觀河圖內要緊應修兩處今特諭在南方面諭你將人字河芒稻河緊急挑挖等諭聞得至今未曾動工若真未動工大有所失似此

遲悞不但運河東隄難保關係民生最重如今若不緊
緊挑寬五六十丈使不得為此又傳諭爾等又一件事
看得河圖內歸仁隄便民閘等口俱已堵塞毛城舖以
下等口俱未堵塞將便民閘等口堵塞毛城舖等口所
出之水將歸何處必定散漫各處民大受害此處關係
緊要宜速籌一策這二事外各處工程修至何等光景
將水勢情形緊急奏聞為此特諭又一件據馬泰回稱
御書上諭已繳有錄出原稿係康熙三十八年三月初
七日欽奉上諭初六日到清水潭九里等處測量水平
看得河水與湖水相高二尺三寸九分這一帶隔河石
隄關係緊要宜當速造朕在此處步行看工未見一個

做工之員著查明叅處至高郵等處河水向湖而流河
水似高一尺乘黃水未深通之前這些處隄工雖一丈
不可忽畧不可不急速攢做為此特諭 十七日河道

總督臣張鵬翮面奉

聖訓引湖水使之由人字河苕稻河入江朕所見最真
爾必須要行 以上並河防志

是年三月內

上諭特遣侍郎常綬等至清口指示方畧將裴家場引
河再加挑挖寬深清口築攔黃壩漕船過完堵閉回
空之時開壩過完仍行堵閉 總河張鵬翮於欽奉
上諭事案內委原任布政司王毓賢等加挑裴家場引

河長一千七百六十丈並築攔黃埽壩于本年秋汛
工完堵禦黃水不出便於放引河水入裏河至八月
回空糧船南下開壩

裏河廳冊

是年四月二十二日總河張鵬翮題奏我

皇上明見萬里洞晰河勢指示周詳仁愛之心無所不
用其極臣將所閱形勢縷晰陳之一人字河宜挑濬
深闊也自金灣閘至孔家渡為河之脈絡見今狹窄
宜開廣闊自此至芒稻山河分兩派又名芒稻河此
處水口兩岸亦狹又有土嶺二處前河臣尚未完
目今湖水方盛宣洩宜急應多募人夫尅期盡行完
去使其暢流水口下有芒稻閘年久塌壞磯心頗高

宜挖深另修因時啓閉以防江潮一鳳皇橋引河之
宜再挑也此河經前河臣新挑因未挑深從橋口至
胡家樓河水絕流竟成平地宜加挑深通引水從王
家莊入運鹽河匯入芒稻河一雙橋灣頭二河之宜
挑深也此二河見今水流同入芒稻河但河底亦有
淺處應俟冬時挑濬深通其灣頭閘座雁翅塌陷宜
及時修砌此三處之水俱相繼會入芒稻河流十八
里入江臣觀江口寬闊河底深通兩岸居民三麥成
熟不慮水患此江都金灣以下至仙女廟之形勢也
唯高郵自擋軍樓起至東西灣止因高堰洪湖之水
滔滔東下西隄淹沒漫入運河東隄一望汪洋水由

城南大壩而出洶湧泛溢當伏秋水漲恐東隄單薄難以捍禦致有不虞宜將見閉三壩相機酌開以保城池隄岸俟秋盡水落修築隄岸堅固之後再行閉塞因係緊要工程挑浚宜急臣一面委官動帑興工一面估計另疏具題理合題明 九卿詹事科道會議具題奉

旨依議速行

鳳皇橋起至裏河王家莊止工長一千四百五十四丈六尺又灣頭入裏河王家莊引河口攔河南壩一道長一十四丈三尺

共估挑河築壩土方工料銀二萬四百六十二兩又芒稻河西土嶺長八十丈三尺東土嶺長八十九丈又東土山下口挑叙嘴一段長十丈又金灣開下自李家渡迤南起由孔家渡至新橋止工長二千二百九十三丈共估土方銀一萬六千三百兩以上共估土方銀三萬六千七百九十五兩內節省銀一千五百二十

六兩 五月初六日大學士伊桑阿馬奇奉

上諭員外郎拖克拖和中書張古禮著馳驛前往河道

總督張鵬翮處將修過河工情形閱看伊等無有專責將工程令河道總督張鵬翮明白繕寫摺子交與伊等帶來啓奏 總河張鵬翮摺奏

黃淮各條分入本水

一運河之宜挑

深也自清河縣運口至高郵州界首一帶裏河頻年黃水入運淤墊從未挑浚前河臣每以加高為事以致河身日高一遇水漲往往潰決堪虞訪之輿論宜加挑浚深通即取河底之泥以加隄身庶為有益臣前已面奏奉

旨俞允欽遵在案俟今冬糧船過盡即煞壩挑浚一切進貢差使暫由陸行 一高寶江都一帶西岸土石隄宜修也今洪澤湖水東下水勢方大西隄盡淹河

湖一片俟冬時水落估計興修。一高郵城南之石壩宜修也。今高郵湖水洶湧經由城南壩上而出以勢漸遠不能盡入人字河而洩宜于秋盡水落照前河臣所估將五壩改爲四滾水壩辦料興修於壩下相度形勢開引河使水有去路。一新改中河隄岸宜修也。兩岸隄工單薄不堪水漲可虞臣查新築隄長一萬七百五十八丈候選州同馬勲等三百五十五員領帑承修內項衝刷灣處估釘排椿二千八百三十四丈桃源縣知縣王珩等十八員領帑承修迄今並未完工除敕令各官上緊照估修築勒限完固如再違抗另疏查叅追帑仍治以誤工之罪臣看新挑

中河窄狹不如舊中河寬深足以容水俟糧船過完於深秋水涸之時臣再率河官復加查勘若舊中河可以修築仍由舊中河行運如果不能築隄再將新中河審度形勢另疏奏聞。又摺奏

黃淮各
八本水

一運口

修築攔黃壩准有部文動帑興工今先築兩岸土壩俟糧船過完再堵運口使黃水歸海引清水入運河一邵伯更樓決口已經修壩堵塞完工糧船通行無阻居民亦鮮水患其舊缺口雖不堵築亦屬無碍且河工需用錢糧浩繁之際似可暫緩。一高郵護城隄工關係緊要經臣題明興修在案今正在修築尅期告竣以資捍禦。一嵇家閘缺口今正在堵築

未完但湖水方盛邵伯南壩已堵若將此口堵塞無處洩水東岸隄工可虞應暫留此口洩水以保隄工經臣題明在案俟秋盡建閘以資宣洩 一人字河芒稻河引湖水入江關係要緊經臣題明挑濬在案今正在上緊挑挖務期寬深速完以資宣洩其芒稻閘俟秋盡水落方可修建 一鳳皇橋引河引湖水由芒稻河入江前因挑挖不深河心又係高岡以致水不能流經臣題明挑挖深通在案今正在上緊挑挖使深務期速竣引水暢流 一劉老澗遙隄造石減水壩內建磯心八座係會勘案內候選知縣佟世燕等領帑承修之工壩牆磯心俱完尚有底石正在

鋪砌未完飭其作速砌完壩下挑引河一道宣洩中河異漲之水自鮑家莊至殷家口入漣河下海馮佑領帑挑浚總未挑完飭其作速挑濬竣工如不竣工另疏題參 一九里決口坐落高郵州九里地方已經堵塞完工 一清河北岸子隄缺口坐落清河縣中河北岸已經堵塞完工謹將見修工程繕寫摺子具奏伏乞

皇上睿鑒施行 初十日總河張鵬翮題臣奉

命視河三月十九日到通州看石壩因其單薄沙築水長可虞交與分司臣王作舟加謹保固四月初二日自濟寧上任後乘舟南下山東一帶運河隄岸閘座

俱皆完固河道並無淺阻其北直挑淺夫銀兩與倉場相近者交與總督與巡撫相近者交與該撫各就便清查初五日由新改中河閱兩岸隄工單薄不堪詢之河官僉云隄工例係隄外臨河坦坡隄內平地陡坡蓋以坦坡可禦風浪之故今新改中河將北岸子隄改為南岸子隄且兩岸狹窄不能容水其清河子隄地居下流兩岸皆水况係虛鬆沙土難抵風浪內外衝激甚屬危險飭行原修各官將單薄虛鬆及殘缺塌卸者加幫高厚夯礮堅實一律完竣如有違抗另疏查叅初六初七等日由清江浦至淮安寶應高郵江都等處查看土隄及排椿工程俱有塌卸殘

缺卑矮單薄不堪之處其西隄自江都縣東西灣起至高郵擋軍樓止被湖水淹沒一望汪洋其永安界首等處石隄修砌十不及一二見在嚴飭經手各官上緊修築堅固速行竣工如有抗違另疏查叅稽家開決口尚未堵塞查原係減壩邵伯南壩既堵應留此口宣洩以保隄工

黃淮各條分入本水

至于挑人字芒稻河引

湖水入江開張福口引河以濟運道均屬緊急工程臣已經一面動帑興工具疏奏明在案其餘工程有應挑應疏之處容臣逐一確估次第入告所有微臣勘過河工情形理合具疏題報奉

旨該部知道 七月二十一日總河張鵬翮題臣到任

後檢查舊案行據員外王登魁等詳稱沂河水勢原有七分入盧口由官河出徐塘口等處流入中河南下濟運有三分由沂河流入壩頭集歸宿邑駱馬湖從西寧橋引河經桃源沐陽安東入海此向來兩分之水勢也近來如遇水發宿邑民田尚且受災若將盧口一帶建閘攔截恐水多由宿境歸於駱馬湖未免湖水泛溢關係宿遷桃源安東沐陽之田舍不無顧此失彼之慮相應備叙原委具覆到臣臣隨於七月初八日自清江浦起行初十日至貓兒窩率同宿虹同知鄧之琮邳州知州佟國珪等至盧口查看沂水至此分爲二派一由正河東流入駱馬湖一直趨

盧口東南流出徐塘口入運河盧口面寬八十餘丈水勢急溜河底積沙詢據邳州居民戴題名等供稱自順治十六年衝開此口水大之年被其淹沒須築隄閉塞方免水患問據盧口東岸宿遷縣居民戴天祥等供稱若堵塞盧口則盧沂河東岸全被淹沒等語此二處之民各執偏見以利於此者又不利於彼也該臣看得邳州民劉三靈等將盧口受患情形叩闕一案先經前河臣于成龍等疏稱沂河兩岸築隄盧口建閘可免漲漫之患部議令河臣親身前往確看具題等因奉

旨依議欽遵在案今臣委官踏看據稱若將盧口一帶

建閘築壩恐水多歸駱馬湖未免湖水泛溢關係宿
挑安沐之田舍是有顧此失彼之慮等語臣復率廳
州等官親往盧口查看沂河水勢直趨盧口面寬溜
急且係沙底不便建閘應於盧口河兩傍隄岸殘缺
之處修補一律束水流入徐塘口既可濟運又使民
生得所矣理合恭疏具題 部議覆奉

旨依議 同日總河張鵬翮題該臣看得科臣張睿條
陳將清河縣以下所有陶莊閘開放出口建瓴之勢
逼溜使南等語部議將清河以下所有陶莊閘開放
挑濬出水或將董安國所挑引河以下酌量挑挖建
閘之處親身詳看具題等因臣率淮揚道王謙等及

衆河官詳看得若將中河改由陶莊閘而行至董安
國所挑引河尾入黃河但清河縣地處窪下面臨黃
河背坐清水二水并漲恐有漂沒之虞必遷移縣治
又多繁費且引河尾地亦窪下恐黃水倒灌雖建閘
可禦若糧船進口行下水數里水溜風猛難以進口
且陶莊閘外黃河北岸皆係坡灘糧船至此難以停
泊不若仍舊入運河沿隄遡流而上至陳家莊渡河
直進仲莊閘草壩從無阻滯應無庸更張者也理合
具題 部議覆奉

旨依議 二十五日大學士伊桑阿馬奇折本啓奏奉
旨見今遣人往張鵬翮處著將河水情形各處工程修

理若何著明白開寫摺子交與遣去筆帖式賁圖啓奏
總河張鵬翮摺奏查黃運中河伏汛水勢情形臣
於六月二十一日題報在案七月初六初七兩晝夜
大雨秋汛水勢大長臣於初八日乘舟前往邳州地
方看閱廬口見山東諸湖水發瀾漫而來陡長丈餘
幸由貓兒窩運河流入駱馬湖從竹絡壩出黃河故
運河隄工俱保平穩中河水勢驟漲將劉老澗上年
原有洩水裏頭草壩漫開水勢洩入壩下兩岸虛鬆
子隄雖有水溝浪窩坍卸之處亦皆幸獲平穩高郵
水勢雖大由南關柏家墩二處滾壩洩水荷蒙我
皇上指授方畧挑挖人字河芒稻河深通洩水暢流入

江高寶江都一帶運河隄工皆保平穩

黃淮二河
分入本條

運口遵

旨於七月初三日煞壩初五日斷流攔截黃水不致內
灌張福口引河一道挑挖工完於七月初八日開放
裴家場引河一道河身挖完亦於七月初八日開放
二水暢流入於運河見今水深四五尺不等俱今題
報在案運河自清口至界首一帶自放引河清水以
來止能衝去浮沙其河底淤泥積墊年久衝刷不動
臣擬於今冬十一月十五日以前回空糧船過完煞
壩挑挖深通六壩閉後黃淮二水并流入運河有所
容納伏祈

敕下倉場侍郎及沿河撫鎮等官嚴催回空糧船務于

十一月十五日以前盡數過淮庶不誤挑浚其浙江等省尾幫糧船恐回空遲滯河凍冰阻請

敕下該撫將減存糧船動苦蓋銀兩修艤照例冬兌冬開庶漕務不致貽誤高郵護城隄埽工一千六百五十丈前經題明委令高郵州知州謝廷瑞等領帑修理已經完工足資捍禦城池民生兩有攸賴邵伯更樓繞挑月河築壩工程已於四月二十七日完工前經題報在案人字河芒稻河委張弼等已挑開寬深引湖水暢流入江鳳皇橋引河因中段土岡堅硬挑挖頗艱見催委員王進楫等上緊挑深刻期完工陶莊引河部臣范承勲等所擬七月內完工因秋雨太

大河身受有積水見在車戽挑完駱馬湖李經邦所修石閘上寬下窄不能下板題明發帑委通判葉增英宿遷縣知縣胡三俊辦料改造見在勒限竣工劉老澗引河係馮佑領帑承挑之工屢催不行挑挖見在查明侵帑數目另疏參追其引河估計發帑挑浚改挑中河子隄未完分數及水溝浪窩之處勒令承修官馬勲等修築填補其頂衝埽灣之處責令承修官王珩等簽釘排椿見在勒限嚴催修理速竣如再不完工另疏查參其高郵城南滾水壩高寶江都一帶土石隄工駱馬湖口竹絡壩處處工程需帑興修戶部所撥五十萬兩委不敷用見在分案估計請撥

錢糧辦料興修此係各處修理之工程也臣謹具揭
付筆帖式開住齎捧奏聞 九月二十日總河張鵬
翻題該臣看得先經臣具奏舊中河可以修隄仍由
舊中河行運如不能築隄將新中河審度形勢另疏
奏聞九卿議覆俟具題之日再議等因移咨到臣臣
率淮揚道王謙等查勘得新中河必須全身挑挖兩
岸子隄全行加幫但所需錢糧頗繁而河頭灣曲糧
船行走不順且三義壩以上三十一里河身狹淺遇
湖水大漲恐不能容納舊中河自河頭起三十二里
至三義壩河甚寬深但三義壩以下至仲莊閘二十
五里河身甚淺南岸河水散漫難築子隄且距黃河

岸甚近今衆議在三義壩將舊中河築攔河隄一道
改入新中河則舊中河之上段與新中河之下段合
為一河糧船可以通行無滯至中河應挑應築之處
關係運道緊要工程一面發帑委官作速興修一面
確估造冊另疏具題外理合先行題明奉

旨前于成龍奏稱將中河改移朕屢經諭其恐有未便
今張鵬翻所奏中河事宜甚當著照所奏行該部知道

清河縣改挑中河熱壩修隄簽釘排樁等工實用銀二萬四千餘兩節省銀四
千二百餘兩桃源縣中河熱壩挑河幫築北岸隄工簽釘排樁及宿遷駱馬湖
開壩等工實用工料土方銀一萬四千餘兩節省銀二千四
百餘兩共實用銀三萬八千餘兩節省銀六千七百餘兩

日總河張鵬翻題案准部咨會議得河道總督張鵬
翻疏稱駱馬湖水由舊中河進石閘入黃河助黃刷

沙如遇黃水大漲恐其倒灌則閉閘以禦之此閘係
原任知州李經邦承修因金門下窄上寬不能下板
到底應飭令李經邦改修金門合式挑挖引河深通
然後議堵中河引水入黃等語應如所奏一面興工
一面將需用銀兩估確具題奉

旨依議速行部咨到臣行據該道廳詳稱李經邦係正
藍旗人並未來工查此閘係緊要難容遲緩照例動
帑委官如式拆修所有應用錢糧行據淮徐道詳估
銀七千九百餘兩造冊前來除原冊送部查覈外此
係李經邦應賠之項仰祈

敕部行令該旗都統於李經邦名下照追還項理合具

題部議准覆奉

旨依議 二十八日總河張鵬翮題看得高郵城南減
水五壩原任河臣于成龍題改滾壩四座臣親往查
勘見高郵湖水洶湧經由城南壩上而出以勢漸遠
不能匯入人字河而洩宜于秋盡水落照前河臣所
估將五壩改爲四滾水壩於壩下開引河使水有去
路不致旁洩經臣于應修二疏內奏明九卿議覆應
如所奏等因奉

旨依議速行今據淮揚道叅議王謙詳估南關大壩迤
南遷建大滾壩一座仍長六十六丈估銀二萬三千
餘兩車邏壩迤南遷建大滾壩一座長六十四丈估

銀二萬二千餘兩實堵南關並柏家墩二大壩共估
掃料土方銀一萬五千餘兩並無浮冒臣親勘覆覈
無異具疏題估 部議准覆奉

旨依議速行

堵南關柏家墩二舊壩原估銀一萬五千餘兩高堰六壩久堵
揚屬水勢銷落改估止需料物土方銀三千三百餘兩較前估

節省銀一萬二千餘兩四十
一年閏六月二十八日題銷

又二十八日總河張鵬翮題該

臣看得清河運口至高郵州界首一帶裏河頻年黃
水內灌運河淤墊久未挑浚以致河身日高宜加挑
浚深通俟今冬糧船過盡即煞壩挑浚一切進貢差
使暫由陸行已經奏明九卿議覆應如所奏等因奉
旨依議速行又於欽奉

上諭事案內具奏擬於十一月十五日以前回空糧船

過完煞壩將運河挑挖深通在案行據淮揚道參議
王謙詳稱自張福口起歷清河山陽寶應三縣至高
郵界首止應挑工段共長三萬一千一百七十九丈
二尺共計土二百零三萬六千六十四方連運遠土
並築攔河隄壩共估土方工料銀二十二萬六千六
百四十八兩零造冊詳估前來臣覆核無異委官照
所管工段承挑監工除原冊送部查覈外相應具疏
題估 部議准覆奉

旨依議速行 十一月初九日刑科掌印給事中陳詵
題竊惟黃淮為患匪伊朝夕

皇上神明獨運睿照所及洞達無遺已將兩河情形熟

悉區畫

特簡張鵬翮總理河道面受 方畧殫心奉行又遣大臣督修高堰天心眷答河伯效靈今年伏汛水勢消落較往年十之三四竚見安瀾就下立慶平成矣乃皇上睿慮周詳猶恐淮黃交漲或致危險此誠至聖至明事所或有誠不可不早為計及者也臣思黃河之工規模已經大定不過實心修築自可告成唯是罅隙之處尚宜早補罅隙既修則一定之規垂之萬世永遠無弊蓋黃河之患最懼旁洩不可兩行即兩岸清水亦不可分洩清水不洩則助黃刷沙水落之時日夜滔滔長流入河若異漲之際河流亦有倒灌之

時然六七天後異漲即平淤沙未堅清水仍出沙隨水流隨流隨去此南北兩岸所以必築隄以障湖障湖以敵黃也自南之歸仁隄潰而胡家溝之口塞矣高堰潰而清口塞矣北之禹王臺洩水而駱馬湖之董口塞矣其塞者非黃水之能塞清而清水之自不能出也黃水塞清不過一時之泛漲清不能出則旁分流弱黃水隨清而入一往不返淤沙愈積愈老河身反高於湖矣今

皇上命張鵬翮修歸仁隄開胡家溝以出濉湖之水命大臣幫高堰以出洪澤湖之水此真一定不易之經乃猶有罅隙當塞者則莫如復天妃閘以防淮水入

運閉中河以導東水入河蓋高堰旣築淮水必高若黃漲不能復出則必擇空地而行舊天妃閘離淮黃交會之處二百餘丈原用閘板閉斷自天妃閘至清江浦共有五閘重運到時遞互啓閉重運一過即行鎖斷官民船隻俱用車盤是以淮之全力俱注於黃其引入運河者不過暫時資其濟運耳自廢天妃閘移七里閘改草壩無復閘板啓閉則淮黃相距之中復有運河以爲尾閘桃汛兩汛黃障其北堰障其東無所分洩勢必盡趨運河運河淺澀迫近淮城萬一潰決清江浦居民可危誠有如此

聖慮所及者故臣以爲必復天妃閘以塞其罅然後淮

水可出而清口可通也至中河之意亦復相同借其通漕可以避黃河之險任其分洩亦復生倒灌之虞近年黃水灌入中河至于噙隄淺涸皆復由此今張鵬翮遵奉

俞旨亦已煞中河頭壩引湖水從石閘出黃矣臣愚以爲宜倣天妃閘舊制之意於新舊兩河中酌量遠近多建閘座重運來時節級啓閉重運過後官民船隻或車盤或走黃河勿令常行開通使清水但資送運一應減水壩盡行堵塞令其俱入黃河不唯宿遷以下河流廣深抑且仲莊閘出口之水不致逼溜使南而清口亦易開通此不過一二補苴而大工可以告

成永遠可以遵守矣奉

旨這事情應否可行著總河張鵬翮速議具奏該部知道
十二月十八日總河張鵬翮題該臣看得科臣陳
詵疏稱自天妃閘至淮安共有五閘必復天妃閘以
塞其罅然後淮水可出等語臣按南河誌平江伯陳
瑄建通濟新莊福興清江板閘等五閘遞相啓閉以
防黃河之淤又慮水發湍急難於啓閉築壩以遏水
衝每歲至六月初旬糧艘過盡伏水將發即於通濟
閘外暫築土壩以遏橫流一應官民船隻俱暫行盤
壩出入至九月初旬開壩今天妃福興板閘久廢新
莊閘亦以無用棄之唯存龍汪閘一座金門參差不

能下板但古今異宜不能盡復五閘臣相度地勢博
訪輿論公議酌復天妃閘一座以防黃水內灌將見
存之龍汪閘寶應閘拆修金門下板設遇水涸遞相
啓閉蓄水濟運但目前運河淤墊正在挑挖俟清水
衝刷淤沙便盡河底之尺寸既定方可安建閘基將
修閘事宜另疏題請又科臣陳詵疏稱新舊兩中河
多建閘座重運來時節級啓閉重運過後勿令常開
等語查中河頭每年糧船過後即行煞壩引湖水由
石閘出黃新運到時又行啓壩需費錢糧不若於中
河頭及中河尾各建石閘一座以時啓閉節宣水勢
於新中河孫家集以上修石閘一座如遇水大洩入

鹽河以殺水勢其修閘需用錢糧另疏估計具題以
上運中兩河科臣題請建閘之處乃河工告成善後
之計事屬可行臣謹具疏題覆 部議覆准具題奉

旨依議速行

中河頭建造石閘一座并上下築壩及挑月河建草壩共該工料銀二萬八千七百八十五兩零中河尾建石閘一座并上下築壩及挑引河裏頭等工共該工料銀二萬九千七百三十七兩零又建孫家集小石閘一座共該工料銀九千一百一十九兩零三共銀六萬七千六百四十二兩零天妃閘舊基間塘年久深窪岸水難乾故椿碎石有碍下椿鋪底議於運口頭草壩迤北建造大石閘一座拆新莊閘石料添用以節省錢糧又東西各築緯隄一道即以挑引河之土築隄再於閘座上下穿開舊隄處所各建草壩一座以固隄束水共估工料銀二萬八千二百四十二兩零寶應南弘濟大閘建造年久閘底閘牆向被水衝壞今議從新估建石閘一座金門鑿槽下板以資啓閉并開挑越河建築埽壩通共需料物工價銀一萬六千四百九十

八兩零

十二月初二日總河張鵬翮題奏臣檢查舊案

康熙三十八年三月初一日奉

上諭下河見有積水不得不引出歸海將串場湖射陽

湖蝦鬚沙溝一帶挑通引積水流歸海欽此仰見我
皇上軫念民生指畫周詳下河數百萬蒼生莫不感頌
我

皇上如天之仁矣因前河臣于成龍未暇兼顧今臣遵
聖訓疏通海口黃水有歸路矣堵塞六壩開闢清口引
淮水會黃二瀆合流入海矣上河漸次就緒乃親往
查勘下河見水勢漸消高原已經種麥唯興化縣形
如釜底積水一時不能全消較泰州鹽城水患尤甚
臣相度形勢博採輿論高寶山陽鹽城一帶之水由
射陽湖之蝦鬚二溝入廟灣以達于海今蝦鬚二溝
因童營漫溢淤為平地雖有夏梁河出水但河身淺

狹不足宣洩是以泛濫於興化鹽城一帶今宜將蝦
鬚二溝淤塞之處約計四十餘里挑挖口寬十丈深
九尺一丈不等引水入朦朧河以達於海約需銀五
萬餘兩高郵滾水壩下之水由興化縣安豐鎮至白
駒場以達於海今自鮑家莊至白駒八十餘里地高
水壅宜挑口寬八丈深六七尺不等引水由白駒場
入海約需銀六萬餘兩其高郵一溝以下見有河形
一片汪洋興化白駒閘以下暢流入海俱不須挑挖
又自興化車路河至丁溪由撈魚港以達於海今撈
魚港淤塞八十餘里應挑口寬八丈深六七尺不等
引水入海約需銀六萬餘兩寶應縣之水由子嬰溝

老河口入射陽湖以達於海今老河口一帶淤淺三
里餘應挑口寬十丈深六七尺不等引水入湖約需
銀二千五百餘兩泰州之水自淤溪至車兒埠淤子
河以入於海今淤子河三十二里被土商築壩釘樁
淤塞不通宜開口寬八丈深六七尺不等約需銀二
萬餘兩引水由苦水洋入海如此則水有去路而積
水可以漸消至于串場河自泰州以至鹽城長三百
餘里多有淤淺若挑至廟灣入海商民兩便但舊例
係鹽商挑浚范公隄長三百里昔人築以捍海今已
殘缺修治需費不貲應俟下河積水消後民有起色
漸圖修舉可也其挑浚蝦鬚溝等河應用銀兩擬於

加捐銀兩動用如蒙允行容臣遴員估計另疏具題
奉

旨這本內事情著照該督所題行該部知道

蝦溝鬚溝射陽湖尾間共計工

長一萬六百七十丈各寬深丈尺不等共估土方銀四萬二千三百八十五兩零其河底板沙之下或有油淤五六尺不等人難站立難以施工則挑至油淤而止就以扣除土方銀略為疏篦令其通行再攔水壩三條估銀二百五十五兩零老鸛尖油葫蘆港瓦子莊應篦疏沙淤共估銀四百九十四兩零合之蝦鬚二溝土方通共估銀四萬三千一百三十五兩零寶應縣之水由于子嬰溝老河口入射陽湖以達於海除子嬰閘下至胭脂溝止一帶河道深通無庸估挑外唯自胭脂溝起由老河口至姚家港止河長六百丈河身淺窄應一律加挑面寬八丈底寬四丈深六尺為度需用土一萬五千二百六十一方每方銀九分該銀一千三百七十三兩零以上並河防志

卷第百三十九

行水金鑑

卷第百四十

運河水

聖祖仁皇帝康熙四十年正月十七日總河張鵬翮題
高寶江都一帶隄岸關係運道最為緊要去夏水盛
西隄盡淹河湖一片經臣奏明俟冬時水落估計興
修九卿議覆准修奉

旨依議速行在案今唐埂等六壩堵閉高寶江都西岸
隄根漸次涸出行據淮揚道叅議王謙詳稱除寶應
縣北城灣南唐隄五淺龍王廟江都西隄排椿等工
尚屬可緩不計外查高郵陸漫閘西岸原屬土隄每
遇伏秋水長危險堪虞應建石土與永安界首二處

石工上下相接以資捍禦計工長一千六百二十五丈五尺估用工料夫匠銀十六萬四千九百五十九兩江都西隄殘缺石工二百四十四段共長一千二百二十七丈五尺亟應補修以資捍禦估用工料銀二萬九千一百四十五兩高郵州東隄朱家田頭單薄危險亟應下埽壓土工長四十八丈估用工料銀四千四百一十九兩清水潭草大王廟東隄裏口險工舊埽年久朽爛堪虞應下埽加工以禦風浪計工長一百五十丈估用工料銀二千八百四兩又金灣三閘裹頭磯心倒缺不堪亟應修理估用工料銀一千二百六十五兩以上各工不在從前估修之內又

永安東隄裏口龍門北灣險工計工長一百丈估用工料銀一千六百六十八兩又永安東隄龍門南北灣裏口埽卸險工計工長一百二十六丈估銀一千八百九兩此二工查係前河臣于成龍等委主事孫叔貽筆帖式泰保等幫築完工復被風浪撞擊埽卸難資捍禦例應賠修若俟催提到工始行補築勢必遲誤亟應先發帑銀修築完日叅追還項以上估修七工共需工料銀二十萬六千七十二兩零除原冊送部查覈外謹具疏題估 部議准覆奉

旨依議速行 二十二日總河張鵬翮題臣按南河志清口至淮安建有五閘遞相啓閉以防黃水之淤又

行水金鑑卷一百四十一
慮水發湍急難於啓閉築壩以遏水衝每歲糧船過盡即於開外建壩以遏橫流一應官民船隻俱暫行盤壩由此而觀則是伏秋水發黃河倒灌自古而已然矣故建閘築壩以防淤墊之患今運河初經挑挖俟清水衝刷使深河底尺寸既定方可建閘臣於覆科臣陳詵復閘疏內曾經題明在案茲清水雖已出黃轉盼桃伏秋汛繼至節宣之道預防之法不可不急籌也今於張福口裴家場中間開引河一道會張福裴場等引河之水並力敵黃但黃水會合衆流來自萬里頻年河身墊高勢大而力强淮水止發源桐柏迄今方出清口一半敵黃又一半濟運終虞力分

而勢弱故蓄高堰之水以助其勢幸而黃水不大亦足以敵之若遇黃水大發在糧船過完之後仍遵旨堵閉攔黃壩使不得倒灌且可以刷深黃河在糧船正行之際遇黃水大發將裴家場引河口門暫閉引清水由三汊河至文華寺入運河以濟運行倘運河水大山陽一帶由涇澗二河洩水入射陽湖下海寶應一帶由子嬰溝洩水入射陽湖下海高郵一帶仍由城南柏家墩二大壩洩水江都一帶由人字河鳳皇橋等河洩水入江若遇黃淮並漲清水由翟家壩天然滾壩洩出黃水由王家營減水壩洩入鹽河至平旺河下海若糧船過完黃水不大發將運河頭壩

煞壩令清水全入黃河以資衝刷一切官民船隻照往例盤壩俟回空糧船到日方可啓壩止留三汊河清水仍由文華寺入運河即古人設天妃閘於糧船過後開閘築壩之意也奉

旨這所奏已得河工秘要著九卿詹事科道會同速議具奏 九卿等議准覆題奉

旨依議速行 六月初八日總河張鵬翮題高郵城南南關車邏二壩經臣題估改建滾壩二座壩下引河因水占難以深量俟水退後逐段估計另疏具題部議奉

旨依議速行在案又高郵滾壩洩下之水由興化縣安

豐鎮至白駒以達於海今自鮑家莊至白駒八十餘里地高水壅亟宜挑濬引水由白駒場入海需用銀兩擬於加捐銀內動用具題奉

旨這本內事情著照該督所題行今行據淮揚道叅議王謙詳估高郵南關大壩以下自攔馬河起至朱三家橋止應挑引河一道長三百九十一丈估土方銀三千九十六兩車邏壩以下自攔馬河起至商家莊止應挑引河一道長三百三十丈估土方銀二千六百一十二兩興化之海溝河自鮑家莊至白駒閘止共長一萬四千四百八十七丈加挑寬深估土方工料銀三萬六千餘兩通共估銀四萬二千餘兩並無

浮冒臣覆核無異除照數動支加捐銀兩委官作速挑挖並估冊送部查核外相應具題。部議准覆奉旨依議。十月初八日總河張鵬翮題淮揚運河係各省糧艘經由要道最關緊要向因黃水倒灌河底墊高一遇水長盈隄溢岸前河臣于成龍於康熙三十八年春發帑委員簽釘排樁內填龍尾小埽以衛隄工三歷伏秋又值運河大挑之後清水暢流兩岸泥土漸次衝刷排樁日見倒壞亟應乘時修理以禦來年挑伏秋三汛今據淮揚道王謙詳估淮屬山陽境內攬補排樁改鑲丁埽需用銀一萬八千餘兩揚屬高寶江三州縣境內攬樁換柴改築坦坡鑲柴壓土

需用工料銀一萬八千餘兩通共估銀三萬七千餘兩並無浮冒造冊詳估前來臣覆核無異不另請撥錢糧一面動支大挑運河節省銀兩武家墩石工樁木節省銀兩作速購料乘時儉修以資捍禦并原冊送部查核外相應具疏題估奉

旨該部議奏 部議准覆奉

旨依議速行 十一月十四日大學士伊桑阿等學士辛保等以工部議覆總河張鵬翮請將高郵州陸漫閘西岸改築土隄折本啓奏奉

旨陸漫閘西岸改築土隄內外鑲柴見今錢糧雖省但蘆柴易致朽爛不能堅久二三年後又致重修張鵬翮

在任時雖無可虞若張鵬翮或離任或淮黃水漲有危險之處鑲柴工程朽爛豈不更難著將這情由備寫差員前往張鵬翮處令其確議具奏 總河張鵬翮摺奏接內閣中書永奇捧

旨到臣內開云云臣跪誦之下仰見我

皇上至聖至明區畫深遠無微不至臣愚先因湖水消落將陸漫開西岸石工改築土隄內外鑲柴原從節省錢糧起見臣今跪讀

俞旨蘆柴易致朽爛不能堅久二三年後又致重修聖主睿鑒甚明應仍修石工以垂永久以資捍禦臣謹遵

旨確議奏聞奉

旨遣人問張鵬翮今奏稱陸漫開西岸應仍修石工以垂永久以資捍禦等語著修石工奏摺并發 十二月二十日總河張鵬翮題奏山陽縣黃河南岸運料河原任河臣董安國署理總河印務徐廷璽具題動帑挑築未完其河頭起於檀度寺閘久已築壩堵閉詢問其故據土人云運河高於運料河數尺恐其開放建瓴之勢直洩無餘是以歷來堵閉臣測量水平果與土人之言無異夫既堵閉則此河為無源之水不能通濟下流亦難運料是此河已無益於運河矣且汰黃隄原在黃河南岸重門保障運料河身居汰黃

行水金鑑卷一百四十一
縷隄二隄之中從前挑挖此河將草灣并小茭陵二處汰黃隄穿斷雖築有草壩難資捍禦是此河又有碍於隄工矣况歷來運料因此河未成係由黃河射陽湖轉運以濟工需是此河既不能分洩運河水勢反將有用之汰黃隄挖斷誠屬無益應停其挑挖將穿壞汰黃隄二處填築堅實以作黃河重門之保障於淮安地方大有裨益其各員應追銀兩追解河庫以備別工之用 部議准題奉

旨依議

河防志

聖祖仁皇帝康熙四十一年二月二十七日總河張鵬翻題運口爲糧艘轉輸要道初春運行之際在桃汛

未發之前水尚未長漕運需水甚亟去歲於石礪築草壩開渠引三汊河之水以濟運糧艘得以通行至桃汛水發即行堵閉今臣率道廳等官再加相度與其每歲開閉需用錢糧不若建造石閘相時啓閉不獨於漕運有益且省每歲修築之資行據淮揚道王謙詳估工料銀二萬三千餘兩並無浮冒造具估冊前來臣覆核無異不另請撥錢糧動支停挑王家營引河銀兩給發辦料興修除原冊送部查核外理合具題奉

旨該部議奏 部議准覆奉

旨依議 三月十四日總河張鵬翻題酌復天妃閘以

行水金鑑卷一百四十一
防黃水內灌將見存龍汪等閘拆修金門下板設遇水涸遞相啓閉蓄水濟運經臣題明將修閘事宜另疏題請部覆俟具題之日再議等因在案今據淮揚道叅議王謙詳稱除龍汪閘見在另文議詳外唯是天妃閘舊基閘塘年久深窪岸水難乾故椿碎石有碍下椿鋪底議於運口頭草壩迤北建造大石閘一座拆新莊閘石料添用以節省錢糧又東西各築緯隄一道即以挑引河之土築隄再於閘座上下穿開舊隄處所各建草壩一座以固隄束水共估工料銀二萬八千二百四十二兩並無浮冒冊估前來臣覆核無異相應題估奉

旨該部議奏 部覆奉

旨依議速行 十一月十六日總河張鵬翮題運河爲糧艘經由要津山清寶應河道自惠濟祠後起至界首止已於康熙三十九年內經臣題估發帑挑挖工完現今冲刷寬深其界首迤下一帶河道向年湖河相連水勢甚大故未挑浚今六壩久閉高寶湖水消落運河水勢平緩上流所刷之沙聚積下流平緩之處河底未免淤墊恐重運未能利涉並應挑挖一律深通以利遄往茲據淮揚道王謙詳稱高郵泥甸橋起至永安南裹頭止應挑河長四千九百九十五丈估挑面寬八丈底寬四丈深一丈並兩頭煞築攔河

行水金鑑卷一百四十一
壩共估土方工料銀二萬四千餘兩委無浮冒冊詳前來臣覆核無異但挑挖運河關係緊要隨動支高郵大工節省銀兩於回空糧船過完作速開壩挑浚一切進貢及差使官兵船隻仍照前過壩者聽其過壩起旱者即行起旱不得擅自開放俟來年新運糧船到時起壩開行除委監工督催并原冊送部查核外相應具疏題估奉

旨界首以下運河若極其淤淺有碍運道即照所題挑浚如漕船尚屬可行則挑浚著停止將此項銀兩留於緊要工程動用該部知道

河防志

聖祖仁皇帝康熙四十二年正月初一日摺奏界首以

下河道康熙三十九年因湖水相連水大未能挑挖今六壩堅閉高郵湖水消落運河流緩沙停江西湖廣糧船身重入水更深不無淺澀盤剝仍應遵

旨挑挖深通以利糧船過行嚴催承挑人員晝夜疾儻

已於十二月二十六日完工二十八日開壩放水理

合具摺奏明 二月初二日

聖駕南巡總河張鵬翮奉

上諭駱馬湖竹絡壩口門宜留 初四日總河張鵬翮奉

上諭仲莊閘清水出口逼溜使南恐運口有碍應於陶家莊以下楊家莊處著挑引河令中河之水從此出口

於運口有益雖楊家莊地勢低窪即使倒灌不過一二里清水仍然頂出著即相度形勢估計具奏仲莊石閘暫停 初五日總河張鵬翮奉

上諭禹王臺沐水由沐陽入海其沐河淤墊之處應勘明疏浚 初七日總河張鵬翮在邵伯更樓奉

上諭此地舊日被災形狀與今山東飢民無異豈朕今日觀此地安居景象而忘山東之飢民乎朕念運糧賑濟關係緊要乘今日順風爾作速回清江料理轉運截留漕糧差官前往散賑距揚州十五里沙壩橋河道情形朕自細閱回鑒時面說與爾知之 三月初二日總河張鵬翮奉

上諭王公隄關係運道民生最為緊要隄岸單薄椿工漸朽應再加幫以資捍禦不可因淤難可恃而忽之也

河防志

是年十二月二十日大學士馬奇等奉

上諭朕這次巡幸西省閱視汾渭俱屬大河直與黃河相通河南等處米石似可由黃河運送但聞三門砥柱水勢甚溜船不能上朕欲親往閱視因陝州知州奏無路徑斷難行走遂未果行命三貝勒同近御侍衛往看據回奏云伊等差人乘騎涉河一道閱有神人鬼三門俱係鑿石開通水從三門流出水勢甚寬水流甚溜古人於岸上鑿有拉船孔眼但未經以船試驗不知可否

行走前總河靳輔亦曾奏黃河通於汴河但淤墊年久若行疏導即可運米等語朕至河南閱河南府居各省之中水路四達最爲緊要之地應於此處儲積米穀每年米穀豈能必皆豐收倘山陝等省間或收成歉薄即可將此積貯米穀修造船隻由黃挽運若到三門砥柱船不能上亦可於三門砥柱造船剥運以至山陝誠使河路疏通則商賈人民大有裨益所宜於無事之時預爲籌畫者也豫省每年解京漕糧二十萬石有奇若將豫省三年漕糧截留備用則陝西等省雖值歉收之年將此米穀運至彼處賑濟殊屬有益俟明歲遣大臣往看

河南管河道治河檔案

聖祖仁皇帝康熙四十三年正月二十一日奉

旨著川陝總督陝西巡撫山西巡撫河南巡撫速行會勘確議具奏

河南管河道治河檔案

是年四月初八日總河張鵬翮奉

上諭昨歲西巡時總河張鵬翮迎至行在朕因山東河道衝決坍塌之處甚多曾命張鵬翮及時修理於新運漕船未到之前報竣至今曾否修完尚未奏聞著行文張鵬翮乘此無事之時親身速赴臨清察明具題回時自中路兗州一帶察看東省人民目前情形及散賑有無實濟並二麥秀實如何著一一具奏 是月總河張鵬翮奏明臣前往臨清一帶查看其間隄岸有去年

大水漫缺之處已經修補完竣利於緯挽漕艘通行
仍飭地方印河等官將本管工程加謹修防以禦伏
秋二汛奉

旨知道了該部知道

山東兗寧道冊

是年四月初九日川陝總督博□□陝西巡撫鄂□
□山西巡撫噶禮河南巡撫徐潮會勘三門河路情
形疏稱臣等伏惟我

皇上功高三古德冠百王軫恤軍民如同保赤經營庶
政宵旰不遑去歲蒙

皇上俯念西疆要地并順軍民想望至誠不憚冰霜
特賜巡幸由山西陝西以至河南簡閱軍旅諮訪民艱

大沛

恩膏蠲租錫賞費逾百萬臣等親隨扈從凡大小事宜
無不仰蒙

聖主指示三省臣民沾荷
天恩均非淺鮮我

皇上於巡視之餘洞悉天下地方形勢以河南府居各
省之中水路四達山陝汾渭二河皆與黃河相接於
此積貯米穀以備不時我

皇上愛民念切凡稍有益於民生者
睿慮經營纖悉必至恐三門砥柱船不能上
特命臣等會勘確議具奏臣等欽遵

諭旨齊至陝州會同前赴三門親身查勘三門在陝州東北四十里兩岸石山鑿分三澗中流謂之神門水勢正溜南岸則爲鬼門石崖曲折水更洶湧北岸則爲人門水略舒緩至三門之下約百餘步則有砥柱再其下二里許則有卧虎灘臣等用陝州船隻從神門放下空舟順流頗覺利便又從卧虎灘下挽舟上行因船方水溜又無舵無篷自辰至申僅止拽行半里臣徐潮先期以河南有篷舵之派子船令新安縣知縣張琦於二月二十四日從新安縣狂口地方坐船由澠池一帶溯流而上計程二百六十餘里此間水溜甚急如卧虎灘之險阻難行者共二十三處兩

岸絕無緯道者甚多若遇順風則一日可行三四里逆風則坐守竟日無風而有緯路處亦可行二十餘里每船約用夫二三十名所以該縣於三月初九日始至三門卧虎灘臣等即將新安空船於卧虎灘下挽緯使篷乘風而上業已從人門徑過又以船載糧三十石用夫三十餘名從上挽行自己至未亦從人門過去兩岸晉豫人民觀者如堵其中父老皆云自有生以來三門河路未見行船今船由三門逆流直上此真爲

聖時盛事不勝贊揚臣等察看情形此路船隻自屬可行但溜急灘多水漲則無緯路行船未免艱難且每

船載糧不過三四十石今上挽空船二百六十里行程十有七日若係重載則必至遲延多費人工濡滯時日似此水運不如陸路剥運之便豫省漕糧截留於河南府備貯是誠經國

聖謨於三省人民均有裨益應遵

旨舉行將河南漕糧即於該府加謹收貯若山陝需糧則竟由河南府陸路運至陝州西門外太陽渡上船計程厘三百餘里馱送不過四五程車行止須七八日脚費更比河路減省至於汴河離三門砥柱六百餘里其黃河通於汴河淤墊年久之處臣徐潮查明另題外再汾渭兩河淤現在行船不無淤墊或某處

可用大船某處水淺應用小船或船隻難行應從陸路起剥相度河流製備船隻臣鄂臣噶禮查明另疏題報謹將臣等查勘情形三門一帶河路繪圖進呈

御覽伏祈

皇上睿鑒敕部議覆施行奉

旨九卿詹事科道會議具奏圖併發會議查得山西存倉米穀共九十五萬三千九百餘石陝西存倉米穀九十萬一百餘石甘肅存倉米穀共四十一萬六千六百餘石前項米穀現貯兩省者尚多若將豫省漕糧截留三年共六十萬餘石積貯年久恐致浥爛

行水金鑑卷一百四十一
古
虧空應暫截留四十四年起運四十四年分漕糧備貯此後漕糧仍行解京如有不足用之時該撫等題明再行截留其所截留一年漕糧二十餘萬石應嚴飭該府州縣加謹收貯毋致浥爛虧空如致浥爛虧空該撫及布政使以下各官俱照例處分仍將收貯數目咨報戶部查核又陝西巡撫鄂 疏稱渭河西至鳳翔東至潼關由渭入黃由黃入汾可抵山西之平陽即或三門水溜客商不敢冒險而汾渭兩河可通舟楫幾二千里然商賈多捨水路而就陸路者皆由陝西船隻方頭平底無柁無蓬而水手又不善於操舟若逆挽拽日行止二三十里所以舟行者甚少

臣同督臣博 酌量捐資於江南等省催覓造船良工熟練水手量水性造船使本地人演試如果可行民船亦照式修造倘遇歉收即可將商民船隻挽運等語又山西巡撫噶禮所稱汾河自河津縣起絳州止裝載一百石之船可以行走自絳州起至平陽府城以及洪洞縣止裝載五六十石之船亦屬可行惟是介休之義棠橋則積石壘壘灘多水急兩岸多山向無緯路自介休以至省城則在在淤淺若非祇遵諭旨製造小船難以行走須用小船似應倣照舢舨船麻陽船式樣製造移咨楚省酌調船匠水手數名來晉成造如果可行捐造一百隻交與本地水手看守豐

年聽其攬載倘遇歉收即於汾河接運漕糧等語又據巡撫噶禮疏稱隨即預造有桅有槳之小船三隻內一隻可裝糧四十石一隻可裝糧三十石一隻可裝糧二十石在於汾河內詳加演試自省城以至介休之義棠橋又自義棠橋以至趙城縣小船俱可行走其自洪洞以至平陽府城自平陽府城以至接運黃河之河津縣止可行走等語均應如該撫等所題准其照原題捐造船百隻以備挽運其汾渭兩河有積石無緯路並於墊之處令該撫等不動正項錢糧設法修治又河南巡撫徐潮疏稱汴河故道一由中牟縣東經祥符等州縣至永城縣出境歷江南省之

宿州而達於淮久矣湮塞皆成陸地一由中牟縣東南經朱仙鎮至沈丘縣出境歷江南省之太和縣而達於淮係元臣賈魯修濬今名賈魯河河身之外尚有支河貼近黃河止隔一隄地名花園康熙十年曾掘開護隄放運柳船以入黃河事畢堵塞今花園塌入黃河人民徙居於南名爲新莊若從新莊挑浚建閘設壩以時啓閉便可開入黃河由黃入洛而通舟楫等語均應如該撫所題不動正項錢糧設法將賈魯河淺處挑浚并從新莊挑浚建閘設壩以時啓閉便可開入黃河以通舟楫仍令該撫及地方汛官不

時防護其工程丈尺造冊報部查核可也奉

旨依議

河南管河道治河檔案 河南府至陝州太陽渡水路計程四百五十里中有淺灘約數十餘處緯路雖窄儘容牽纜止澗池一帶緯路年久間有塌卸閱視通池以下河流頗緩下水船可載三百餘石上半之澗池以上河身漸高灘水愈迅雖有緯路僅可挽數十石之舟至砥柱而上河中大石分峙列爲三門神門本無緯路若小舟乘東南風猶或可上鬼門水勢最爲洶湧從未見有行舟唯人門之水稍緩石崖鑿有緯路緯路之上排列礮有礮眼約離二尺其高三尺又鑿有石鼻約離丈餘詢之土人俱稱不曉臣愚揣石鼻可穿鐵索緯夫援手以著力方眼之設石路滑潤裝木限以助足力亦未可知臣將本地小方船令從人門放空而下亦覺平穩復令從下流輓上人門因湍急退下砥柱自午至申仍由人門而上蓋船方頂溜併無桅舵人又不善操舟故也按此則歷代輓運之蹟猶存誠如

聖諭再太陽渡至西安府河水平穩船可通行俱有輓運路徑並繪圖奏上 又議運糧之法河南府至陝州之三門一帶河道現在無可覓之船謹議以河南府至陝州太陽渡陸路計程三百五里今運穀二十萬用車裝運計程五日可到每車裝穀八石每日給腳價三錢五分沿途州縣遞運以惜牛力共需車腳銀四萬三千七百五十兩自太陽渡至西安黨家馬頭水運爲便每石給水腳銀錢三分共需銀二萬六千兩自黨家馬頭至西安府陸路每石給車腳銀二分共銀四千兩共裝穀口袋照依河撫原議定價三萬兩置備以上通共需銀十萬三千七百五十兩腳價統於豫省支銷抑臣更有請者運穀二十萬石止得十萬之米其一半盡屬糠粃徒費腳價無益合令以二穀易一米起運則脚

價更省一倍矣此總漕施世綸行述中所載備錄之以資參考 川陝總督佛倫上籌奏疏言湖廣襄陽府有自襄江進小江口通於陝西商州龍駒寨水路

一道自襄陽府至小江口二百四十里襄江大船載運每船可八九十石至石自小江口換小船至河南淅川縣荆子關二百餘里每船可四五十石又於淅川縣換小船至陝西商州縣徐家店二百餘里河狹灘多每船可載七八石自徐家店至商州龍駒寨二百里此段水路多難險每船可載五六石至龍駒寨已上不通舟楫龍駒寨至西安府相距四百餘里中間有秦嶺藍關七盤等嶺則係嶺路有百里許臣唯小江口至龍駒寨雖係山河亦古來轉運河道但近代久不行運恐河道間有淤廢若此運道果能廣運楚米至龍駒寨積貯較之陸路輓運殊爲便易龍駒寨至省城不遠所積糧米自可隨時調度以備不虞奉

旨下九卿議覆准奉

旨命內閣學士德珠往會同查勘此居易錄中所載并附錄之以見西北未嘗無轉運之道也

是年十月十三日濟寧道張伯行爲請築汶河隄岸以衛民田以救民生事竊照康熙四十一二兩年寧陽汶上濟寧滋陽魚臺滕縣嶧縣及江南之沛縣徐州邳州連遭水患者皆由於汶河隄岸不修之故也

查寧陽汶河南岸有石梁口最稱險要歷來各州縣之所被水者皆由於此至四十一二兩年爲害更烈而汶河南岸之沖決者又不止石梁一口也又有桑家等口俱經沖決淹沒之慘較往倍甚今年雨水稀少幸未沖決然而不可恃也本道於九月間親往查看見隄工甚是單薄且係頂沖而離隄數十丈內有高阜之地可以加築越隄又見石梁口上下隄岸殘缺甚多若於石梁口內添築越隄再於桑家等口堵築堅固又於沿河一帶隄岸加幫高厚不惟寧陽不受水災而汶上濟寧滋陽魚臺滕縣嶧縣及江南之沛縣徐州邳州俱蒙寧陽之福矣蓋石梁等口一開

先淹寧陽次及濟寧滋陽汶上漸至魚臺滕縣嶧縣而並及於江南之沛縣徐州邳州是此十數州縣之被淹皆由於寧陽石梁等口之沖決也夫堵築石梁等口加幫汶河隄岸非有浩大工程難以奏績也爲功甚少而造福無窮從前皆因循誤事逮至沖決即欲補救而已無及矣直至十數州縣被淹之後而始行堵築則何益矣若及今不早爲修築將來山水發時勢必仍屬難免祈憲行司轉行該府令其嚴飭該縣將石梁口加修越隄桑家等口堵築堅固沿河隄岸加幫高厚並嚴飭汶上縣令其照依寧陽加幫汶上隄岸庶水不爲害而寧陽汶上濟寧滋陽等十數

州縣之民均免水患淹沒之害矣 又爲詳明南旺大小挑之定制以利漕運以蘇民生事案查宋尚書祠記云用白英計作壩戴村橫亘五里遏汶水令盡出於南旺乃分爲二水以其三南入於漕河以接徐呂以其七北會於臨清以合漳衛此定制也其三分往南者蓋以南有府河泗河洸河並馬場獨山南陽昭陽微山各湖又有彭家口大泛口二河其餘諸泉不可勝數此所以三分往南而不患其水少也不知始自何年今竟改爲七分爲南矣惟其七分往南所以每逢雨澇之年濟寧魚沛一帶民田在在淹沒今議仍改爲三分往南民田得免淹沒之患矣其七分

往北者蓋以北止有安山一湖以爲之接濟所以七分往北而不患其水多也不知始自何年今竟改爲三分往北矣惟其三分往北水勢甚微而安山一湖又經招租起科無水接濟所以每逢亢旱之年東昌一帶在在淺阻今議仍改七分往北庶糧船無淺阻之患矣呈院院批據詳南旺水勢今改爲七分往南三分往北等語始於何年改自何人水之分數有何憑據未經聲明又云今議仍改七分往北等語查安山湖久涸民佃起科無水濟運故早年東昌一帶有膠舟之患今作何開引河導水作何修閘壩蓄水濟運未據籌畫指陳遽云改七分往北何其言之易也

仰道率府廳州縣印務等官虛心勘議明確果可見
之施行勿為紙上空談即定議通詳如無定見慎勿

紛更

舊云按宋尚書用白英老人計築戴村壩遏汶流使無南入洸而北歸海諸泉之水盡出汶上至南旺中分之爲二道南流接徐沛十之四北流達臨清十之六所謂水脊也見明史稿宋禮傳明會典亦云然則是四分往南六分往北矣唯新輔重修宋康惠祠記有云南旺分水三分濟南漕七分北會臨德合漳衛

之語張公所云本此

又爲詳明開座之制以便遵守事竊

查柳林爲南旺上閘十里爲南旺下閘山東一千餘
里之運道其關鍵總在於南旺則南旺之所係爲最
要也查南旺以南接濟之水甚多南旺以北並無涓
滴之水助運則柳林閘與十里閘正未可等視也今
議將柳林閘爲界水閘則使汶河之水盡濟北運而
南運則用府泗等河馬場湖之水以濟之其要在柳

林閘之啓閉宜嚴也尋常有水之時十里閘與柳林
閘照舊啓閉無容分別一遇北河水小之時將柳林
閘板嚴下十里閘板盡啓使水盡往北行若汶河水
長兩閘仍舊下板使水俱由斗門入南旺湖蓄以濟
運迨至水勢盛大之時則啓十里閘板而柳林閘板
仍行嚴閉使水由彭石口孫強口劉賢口入南旺湖
若水漫過柳林閘板仍將寺前鋪閘板嚴下使水由
張廟口盛進口焦鸞口入南旺湖是以柳林閘爲界
水頭閘寺前鋪閘爲界水二閘總使汶河之水專濟
北運不令南行也而又用蜀山湖之水出分水口以
濟北運用馬踏湖之水出新河頭弘仁橋以濟北運

又用南旺湖之水出關家大閘五里鋪滾水壩以濟北運則北河之水自不至於太小而東昌一帶糧船自無淺阻之患矣如或謂南旺之水盡濟北運柳林閘下不慮水小乎不知若遇柳林閘水小再將十里閘板嚴下將柳林閘板酌量啓閉而南河亦不患無水矣總之必須南旺閘官汶上主簿小心謹慎啓閉得宜方克有濟詳院批春夏汶水微弱運艘淺於南則閉南旺北閘以濟之運艘淺於北則閉南旺南閘以濟之以智役水臨時酌之此潘公之成法也今年五月臨清水小倣此法行之而東昌迤北運艘得以魚貫而下以運艘盡過南旺故柳林閘可久閉也今

詳稱水入嚴閉柳林閘使水由彭石等口入南旺湖若水漫柳林閘仍嚴閉寺前閘使水由張廟等口入南旺湖等語但運艘盛行之際閘閉不便日久且水既漫閘則南旺湖水亦大若南北二閘同閉不惟湖不能納且恐有衝突之患不可不慮之周也又云蜀山湖水出分水口馬踏湖水出弘仁橋南旺之水出關家大閘五里鋪滾水壩俱濟北運等語各口閘壩現在果無殘缺可以開放開時果於運道民地兩有利乎尚須勘議妥當勘明確議詳奪

居濟一得

行水金鑑卷一百四十一

三

